

Discussion Draft Release

ओं नमः परमात्मने, श्री महागणपतये नमः

श्री गुरुभ्यो नमः

हरिः ओं
—

कृष्ण यजुर्वेदीय तैत्तिरीय संहिता क्रम पाठः

सप्तम काण्डे, प्रथमः प्रश्नः

Table of Contents

7. कृष्ण यजुर्वेदीय तैत्तिरीय संहिता क्रम पाठः.....	3
7.1 सप्तम काण्डे प्रथमः प्रश्नः क्रम पाठं – अश्वमेधगतमन्त्राणामभिधानं.....	3

=====

ओं नमः परमात्मने, श्री महागणपतये नमः

श्री गुरुभ्यो नमः, हरिः ओं

7. कृष्ण यजुर्वेदीय तैत्तिरीय संहिता क्रम पाठः

7.1 सप्तम काण्डे प्रथमः प्रश्नः क्रम पाठं –
अश्वमेधगतमन्त्राणामभिधानं

TS 7.1.1.1 - Kramam

प्र॒जन॒नम् ज्यो॒तिः । प्र॒जन॒नमि॒ति प्र – जन॒नम् । ज्यो॒तिर॒ग्निः ।
अ॒ग्निर् दे॒वता॑नाम् । दे॒वता॑नाम् ज्यो॒तिः । ज्यो॒तिर् वि॒राट् ।
वि॒राट् छ॒न्दसा॑म् । वि॒राडि॒ति वि – राट् । छ॒न्दसा॑म् ज्यो॒तिः ।
ज्यो॒तिर् वि॒राट् । वि॒राड् वा॒चः । वि॒राडि॒ति वि – राट् ।
वा॒चो॑ऽऽनौ । अ॒ग्नौ सम् । सम् तिष्ठ॑ते । तिष्ठ॑ते वि॒राज॑म् ।
वि॒राज॑म॒भि । वि॒राज॑मि॒ति वि – राज॑म् । अ॒भि सम् । सम् प॒द्यते॑ ।
प॒द्यते॑ तस्मा॑त् । तस्मा॑त् तत् । तज् ज्यो॒तिः । ज्यो॒तिरु॒च्यते॑ । उ॒च्यते॑
द्वौ । द्वौ स्तो॒मौ । स्तो॒मौ प्रा॒तस्स॒वनम् । प्रा॒तस्स॒वनम् व॑हतः ।
प्रा॒तस्स॒वनमि॒ति प्रा॒तः – स॒वनम् । व॒हतो॑ यथा॑ । यथा॑ प्रा॒णः ।
प्रा॒णश्च॑ । प्रा॒ण इति॑ प्र – अ॒नः । चा॒पानः॑ । अ॒पान॑श्च॑ ।

अ॒पा॒न इ॒त्य॒प – अ॒नः । च॒ द्वौ । द्वौ मा॒द्ध्य॒न्दि॒नम् । मा॒द्ध्य॒न्दि॒न॒ꣳ
स॒व॒नम् । स॒व॒नम् य॑था । य॒था च॒क्षुः । च॒क्षुश्च॑ । च॒ श्रो॒त्रम् ।
श्रो॒त्रम् च॑ । च॒ द्वौ । द्वौ तृ॒तीय॒स॒व॒नम् । तृ॒तीय॒स॒व॒नम् य॑था ।
तृ॒तीय॒स॒व॒न॒मि॒ति तृ॒तीय – स॒व॒नम् । य॒था वाक् । वाक् च॑ ।
च॒ प्र॒ति॒ष्ठा । प्र॒ति॒ष्ठा च॑ । प्र॒ति॒ष्ठेति॑ प्र॒ति – स्था । च॒ पु॒रु॒ष॒स॒म्मि॒तः ।
पु॒रु॒ष॒स॒म्मि॒तो वै । पु॒रु॒ष॒स॒म्मि॒त इति॑ पु॒रु॒ष – स॒म्मि॒तः । वा ए॒षः ।
ए॒ष य॒ज्ञः । य॒ज्ञोऽ॒स्थू॒रिः । अ॒स्थू॒रिर् यम् । 1 (50/60)

TS 7.1.1.2 - Kramam

यम् का॒मम् । का॒मम् का॒म॒य॒ते । का॒म॒य॒ते तम् । तमे॒तेन॑ । ए॒तेना॒भि ।
अ॒भ्य॒श्नु॒ते । अ॒श्नु॒ते स॒र्वम् । स॒र्व॒ꣳ हि । ह्य॒स्थू॒रिणा॑ ।
अ॒स्थू॒रिणा॑ऽअ॒भ्य॒श्नु॒ते । अ॒भ्य॒श्नु॒तेऽग्नि॑ष्टोमे॒न । अ॒भ्य॒श्नु॒त
इ॒त्य॒भि – अ॒श्नु॒ते । अ॒ग्नि॑ष्टोमे॒न वै । अ॒ग्नि॑ष्टोमे॒नेत्य॑ग्नि॒-स्तो॒मेन॑ ।
वै प्र॒जाप॑तिः । प्र॒जाप॑तिः प्र॒जाः । प्र॒जाप॑तिरि॒ति प्र॒जा – प॒तिः ।
प्र॒जा अ॒सृ॒ज॒त । प्र॒जा इति॑ प्र – जाः । अ॒सृ॒ज॒त ताः ।
ता अ॒ग्नि॑ष्टोमे॒न । अ॒ग्नि॑ष्टोमे॒नैव । अ॒ग्नि॑ष्टोमे॒नेत्य॑ग्नि – स्तो॒मेन॑ ।

ए॒व परि॑ । पर्य॑गृ॒ह्णात् । अ॒गृ॒ह्णात् ता॒साम् । ता॒साम् परि॑गृ॒हीता॒नाम् ।
 परि॑गृ॒हीता॒नामश्च॑तरः । परि॑गृ॒हीता॒नामि॒ति परि॑ – गृ॒हीता॒नाम् ।
 अ॒श्वत॑रोऽति॑ । अ॒त्यप्र॑वत । अ॒प्रव॑त तस्य॑ । तस्या॑नु॒हाय॑ । अ॒नुहा॑य
 रे॒तः । अ॒नुहा॑येत्यनु॑ – हा॒य । रे॒त आ॑ । आ॒ऽदत्त॑ । अ॒दत्त॑ तत् ।
 तद् गर्द॑भे । गर्द॑भे नि । न्य॒मार्द् । अ॒मार्द् तस्मा॑त् । तस्मा॑द् गर्द॑भः ।
 गर्द॑भो द्वि॒रेताः॑ । द्वि॒रेता॑ अथो॑ । द्वि॒रेता॑ इति॑ द्वि – रेताः॑ ।
 अथो॑ आहुः । अथो॑ इत्यथो॑ । आहु॑र् वड॑बायाम् । वड॑बायाम् नि ।
 न्य॒मार्द् । अ॒मार्डि॑ति । इति॑ तस्मा॑त् । तस्मा॑द् वड॑बा । वड॑बा
 द्वि॒रेताः॑ । द्वि॒रेता॑ अथो॑ । द्वि॒रेता॑ इति॑ द्वि – रेताः॑ । अथो॑ आहुः ।
 अथो॑ इत्यथो॑ । आहु॑रोष॑धीषु । ओष॑धीषु नि । 2 (50/61)

TS 7.1.1.3 - Kramam

न्य॒मार्द् । अ॒मार्डि॑ति । इति॑ तस्मा॑त् । तस्मा॑दोष॑धयः ।
 ओष॑धयोऽन॑भ्यक्ताः । अन॑भ्यक्ता रे॒भन्ति॑ । अन॑भ्यक्ता
 इत्य॑नभि – अ॒क्ताः । रे॒भन्त्यथो॑ । अथो॑ आहुः । अथो॑ इत्यथो॑ ।
 आहुः॑ प्र॒जासु॑ । प्र॒जासु॑ नि । प्र॒जास्वि॑ति प्र – जा॒सु । न्य॒मार्द् ।
 अ॒मार्डि॑ति । इति॑ तस्मा॑त् । तस्मा॑द् य॒मौ । य॒मौ जा॑येते ।

जा॒ये॒ते॒ तस्मा॑त् । जा॒ये॒ते॒ इति॑ जा॒ये॒ते । तस्मा॑द॒श्व॒त॒रः । अ॒श्व॒त॒रो
 न । न प्र । प्र जा॒ये॒ते । जा॒य॒त आ॒त्त॒रे॒ताः । आ॒त्त॒रे॒ता हि ।
 आ॒त्त॒रे॒ता इ॒त्यात्त॑ – रे॒ताः । हि तस्मा॑त् । तस्मा॑द् ब॒र्हि॒षि ।
 ब॒र्हि॒ष्य॒न॒व॒क्लृ॒प्तः । अ॒न॒व॒क्लृ॒प्तः स॒र्व॒वे॒द॒से । अ॒न॒व॒क्लृ॒प्त
 इ॒त्य॒न॒व – क्लृ॒प्तः । स॒र्व॒वे॒द॒से वा । स॒र्व॒वे॒द॒स इति॑
 स॒र्व – वे॒द॒से । वा स॒ह॒स्र॑ । स॒ह॒स्र॑ वा । वाऽ॒व॒क्लृ॒प्तः ।
 अ॒व॒क्लृ॒प्तोऽति॑ । अ॒व॒क्लृ॒प्त इ॒त्य॒व – क्लृ॒प्तः । अ॒ति हि ।
 ह्य॒प्र॒व॒त । अ॒प्र॒व॒त यः । य ए॒वम् । ए॒वम् वि॒द्वान् । वि॒द्वान॑ग्नि॒ष्टो॒मेन॑ ।
 अ॒ग्नि॒ष्टो॒मेन॑ य॒ज॒ते । अ॒ग्नि॒ष्टो॒मेने॒त्य॒ग्नि – स्तो॒मेन॑ । य॒ज॒ते प्र ।
 प्रा॒जा॒ताः । अ॒जा॒ताः प्र॒जाः । प्र॒जा ज॒न॒य॒ति । प्र॒जा इति॑ प्र – जाः ।
 ज॒न॒य॒ति परि॑ । परि॑ प्र॒जा॒ताः । प्र॒जा॒ता गृ॒ह्णा॒ति । प्र॒जा॒ता इति॑
 प्र – जा॒ताः । गृ॒ह्णा॒ति तस्मा॑त् । तस्मा॑दाहुः । आ॒हुर् ज्ये॒ष्ठ॒य॒ज्ञः ।
 ज्ये॒ष्ठ॒य॒ज्ञ इति॑ । ज्ये॒ष्ठ॒य॒ज्ञ इति॑ ज्ये॒ष्ठ – य॒ज्ञः ।
 इति॑ प्र॒जा॒प॒तिः । 3 (50/62)

TS 7.1.1.4 - Kramam

प्र॒जाप॑तिर् वाव । प्र॒जाप॑तिरिति॑ प्र॒जा – प॑तिः । वाव॑ ज्येष्ठः । ज्येष्ठः
 सः । स॑ हि । ह्ये॒तेन॑ । ए॒तेना॑ग्रै । अ॒ग्रेऽय॑जत । अ॒यज॑त प्र॒जाप॑तिः ।
 प्र॒जाप॑तिरकामयत । प्र॒जाप॑तिरिति॑ प्र॒जा – प॑तिः । अ॒काम॑यत प्र ।
 प्र जा॑येय । जा॒येये॑ति । इति॑ सः । स॑ मु॒खतः॑ । मु॒खत॑ स्त्रि॒वृत॑म् ।
 त्रि॒वृत॑म् निः । त्रि॒वृत॑मिति॑ त्रि-वृत॑म् । निर॑मिमीत । अ॒मिमी॑त तम् ।
 तम॑ग्निः । अ॒ग्निर् दे॒वता॑ । दे॒वता॑ऽनु । अ॒न्वसृ॑ज्यत । अ॒सृज्य॑त
 गा॒यत्री॑ । गा॒यत्री॑ छन्दः । छन्दो॑ रथ॒न्तर॑म् । रथ॒न्तर॑म् साम् ।
 रथ॒न्तर॑मिति॑ रथम् – त॒रम् । साम् ब्रा॒ह्मणः॑ । ब्रा॒ह्मणो॑ म॒नुष्या॑णाम् ।
 म॒नुष्या॑णामजः । अजः॑ प॒शूना॑म् । प॒शूना॑म् तस्मात् । तस्मात् ते ।
 ते मु॒ख्याः॑ । मु॒ख्या॑ मु॒खतः॑ । मु॒खतो॑ हि । ह्यसृ॑ज्यन्त ।
 अ॒सृज्य॑न्तो॒रसः॑ । उ॒रसो॑ बा॒हुभ्या॑म् । बा॒हुभ्या॑म् पञ्चद॒शम् ।
 बा॒हुभ्या॑मिति॑ बा॒हु – भ्या॑म् । पञ्चद॒शम् निः । पञ्चद॒शमिति॑
 पञ्च – द॒शम् । निर॑मिमीत । अ॒मिमी॑त तम् । तमिन्द्रः॑ ।
 इन्द्रो॑ दे॒वता॑ । दे॒वता॑ऽनु । अ॒न्वसृ॑ज्यत । अ॒सृज्य॑त त्रि॒ष्टुप् ।
 त्रि॒ष्टुप् छन्दः॑ । छन्दो॑ बृ॒हत् । बृ॒हत् साम् । 4 (50/56)

TS 7.1.1.5 - Kramam

साम॑ राज॒न्यः । राज॒न्यो म॒नु॒ष्या॒णाम् । म॒नु॒ष्या॒णाम॒विः । अ॒विः
 प॒शूना॒म् । प॒शूना॒म् तस्मा॑त् । तस्मा॑त् ते । ते वी॒र्या॑वन्तः । वी॒र्या॑वन्तो
 वी॒र्या॑त् । वी॒र्या॑वन्त इति॑ वी॒र्य - वन्तः॑ । वी॒र्या॑दधि । ह्यसृ॑ज्यन्त ।
 असृ॑ज्यन्त म॒द्ध्यतः॑ । म॒द्ध्यतः॑ स॒प्तद॒शम् । स॒प्तद॒शम् निः ।
 स॒प्तद॒शमि॑ति स॒प्त - द॒शम् । नि॒रमि॑मीत । अ॒मिमी॑त तम् ।
 तम् वि॒श्वे॑ । वि॒श्वे दे॒वाः । दे॒वा दे॒वताः॑ । दे॒वता॑ अनु । अ॒न्वसृ॑ज्यन्त ।
 अ॒सृज्य॑न्त जग॑ती । जग॑ती छ॒न्दः । छ॒न्दो वैरू॑पम् । वैरू॑पꣳ साम ।
 साम॑ वै॒श्यः । वै॒श्यो म॒नु॒ष्या॒णाम् । म॒नु॒ष्या॒णाम् गा॒वः ।
 गा॒वः प॒शूना॒म् । प॒शूना॒म् तस्मा॑त् । तस्मा॑त् ते । त आ॒द्याः ।
 आ॒द्या अ॒न्नधा॑नात् । अ॒न्नधा॑नादधि । अ॒न्नधा॑नादित्य॒न्न - धा॑नात् ।
 ह्यसृ॑ज्यन्त । असृ॑ज्यन्त तस्मा॑त् । तस्मा॑द् भू॒याꣳसः॑ ।
 भू॒याꣳसोऽन्ये॑भ्यः । अ॒न्येभ्यो॑ भू॒यिष्ठाः॑ । भू॒यिष्ठा॑ हि । हि दे॒वताः॑ ।
 दे॒वता॑ अनु । अ॒न्वसृ॑ज्यन्त । असृ॑ज्यन्त प॒त्तः । प॒त्त एक॑वि॒ंशम् ।
 एक॑वि॒ंशम् निः । एक॑वि॒ंशमि॑त्येक - वि॒ंशम् ।

निर॑मिमी॒त । अ॒मिमी॒त तम् । तम॑नु॒ष्टुप् । अनु॑ष्टुप् छन्दः ।

अनु॑ष्टु॒बित्य॑नु – स्तुप् । छन्दोऽनु । 5 (50/55)

TS 7.1.1.6 - Kramam

अ॒न्वसृ॑ज्यत । अ॒सृज्य॑त वैराजम् । वैराज॑ साम । साम॑ शू॒द्रः ।
 शू॒द्रो म॑नु॒ष्याणाम् । म॑नु॒ष्याणाम॑श्वः । अश्वः॑ पशू॒नाम् । पशू॒नाम्
 तस्मा॑त् । तस्मा॑त् तौ । तौ भू॒तसङ्क्रा॑मिणौ । भू॒तसङ्क्रा॑मिणाव॒श्वः ।
 भू॒तसङ्क्रा॑मिणा॒विति॑ भू॒त – सङ्क्रा॑मिणौ । अश्व॑श्च । च॒ शू॒द्रः ।
 शू॒द्रश्च॑ । च॒ तस्मा॑त् । तस्मा॑च्छू॒द्रः । शू॒द्रो य॒ज्ञे । य॒ज्ञेऽन॑वक्लृप्तः ।
 अ॒न॒वक्लृ॑प्तो न । अ॒न॒वक्लृ॑प्त इत्य॒न॒व – क्लृ॑प्तः । न हि ।
 हि दे॒वताः॑ । दे॒वता॑ अ॒नु । अ॒न्वसृ॑ज्यत । अ॒सृज्य॑त तस्मा॑त् ।
 तस्मा॑त् पादौ । पादा॑वुप । उप॑ जी॒वतः॑ । जी॒वतः॑ प॒त्तः । प॒त्तो हि ।
 ह्य॒सृज्ये॑ताम् । अ॒सृज्ये॑ताम् प्रा॒णाः । प्रा॒णा वै । प्रा॒णा इति॑
 प्र – अ॒नाः । वै त्रि॒वृत् । त्रि॒वृद॑र्द्धमा॒साः । त्रि॒वृदि॑ति त्रि – वृत् ।
 अ॒र्द्धमा॑साः पञ्च॒दशः॑ । अ॒र्द्धमा॑सा इत्य॒र्द्ध – मा॑साः । पञ्च॒दशः॑
 प्र॒जाप॑तिः । पञ्च॒दश॑ इति पञ्च – द॒शः । प्र॒जाप॑तिः सप्त॒दशः॑ ।
 प्र॒जाप॑तिरिति प्र॒जा – प॑तिः । सप्त॒दश॑स्त्रयः ।

सप्तदश इति सप्त - दशः । त्रय इमे । इमे लोकाः ।
लोका असौ । असावादित्यः । आदित्य एकविंशः । एकविंश
एतस्मिन् । एकविंश इत्येक - विंशः । एतस्मिन् वै । वा एते ।
एते श्रिताः । श्रिता एतस्मिन् । एतस्मिन् प्रतिष्ठिताः () । प्रतिष्ठिता
यः । प्रतिष्ठिता इति प्रति - स्थिताः । य एवम् । एवम् वेद ।
वेदैतस्मिन् । एतस्मिन्नेव । एव श्रयते । श्रयत एतस्मिन् ।
एतस्मिन् प्रति । प्रति तिष्ठति । तिष्ठतीति तिष्ठति ॥ 6 (59/69)

(अस्थूरि - रोषधीषु - ज्येष्ठयज्ञ इति - बृह - दनुष्टुप् छन्दः -
प्रतिष्ठिता - नव च) (A1)

TS 7.1.2.1 - Kramam

प्रातस्सवने वै । प्रातस्सवन इति प्रातः - सवने । वै गायत्रेण ।
गायत्रेण छन्दसा । छन्दसा त्रिवृते । त्रिवृते स्तोमाय । त्रिवृत इति
त्रि - वृते । स्तोमाय ज्योतिः । ज्योतिर् दधत् । दधदेति । एति
त्रिवृता । त्रिवृता ब्रह्मवर्चसेन । त्रिवृतेति त्रि - वृता । ब्रह्मवर्चसेन
पञ्चदशाय । ब्रह्मवर्चसेनेति ब्रह्म-वर्चसेन । पञ्चदशाय ज्योतिः ।

पञ्चदशायेति पञ्च – दशाय । ज्योतिर् दधत् । दधदेति । एति
 पञ्चदशेन । पञ्चदशेनौजसा । पञ्चदशेनेति पञ्च – दशेन ।
 ओजसा वीर्येण । वीर्येण सप्तदशाय । सप्तदशाय ज्योतिः ।
 सप्तदशायेति सप्त – दशाय । ज्योतिर् दधत् । दधदेति । एति
 सप्तदशेन । सप्तदशेन प्राजापत्येन । सप्तदशेनेति सप्त – दशेन ।
 प्राजापत्येन प्रजननेन । प्राजापत्येनेति प्राजा – पत्येन ।
 प्रजननेनैकविंशाय । प्रजननेनेति प्र – जननेन । एकविंशाय
 ज्योतिः । एकविंशायेत्येक-विंशाय । ज्योतिर् दधत् । दधदेति ।
 एति स्तोमः । स्तोम एव । एव तत् । तथ् स्तोमाय । स्तोमाय
 ज्योतिः । ज्योतिर् दधत् । दधदेति । एत्यथो । अथो स्तोमै ।
 अथो इत्यथो । स्तोम एव । एव स्तोमम् । स्तोममभि । अभि प्र ।
 प्रणयति । नयति यावन्तः । यावन्तो वै । वै स्तोमाः । स्तोमास्तावन्तः ।
 तावन्तः कामाः । कामास्तावन्तः । तावन्तो लोकाः () ।
 लोकास्तावन्ति । तावन्ति ज्योतींषि । ज्योतींष्येतावतः ।
 एतावत एव । एव स्तोमान् । स्तोमानेतावतः । एतावतः कामान् ।

कामा॑ने॒ताव॑तः । ए॒ताव॑तो लो॒कान् । लो॒काने॒ताव॑न्ति । ए॒ताव॑न्ति
ज्योती॑ष्णि । ज्योती॑ष्य॒व । अव॑ रुन्धे । रुन्ध॑ इति रुन्धे ॥ 7 (63/75)

(ताव॑न्तो लो॒का - स्त्रयो॑दश च) (A2)

TS 7.1.3.1 - Kramam

ब्र॒ह्म॒वादि॑नो वद॑न्ति । ब्र॒ह्म॒वादि॑न इति ब्र॒ह्म - वा॒दिनः॑ । वद॑न्ति सः ।
स तु । त्वै । वै यजे॑त । यजे॑त यः । योऽग्नि॑ष्टोमेन । अग्नि॑ष्टोमेन
यज॑मानः । अग्नि॑ष्टोमेनेत्यग्नि - स्तो॒मेन॑ । यज॑मानोऽथ । अथ
सर्व॑स्तोमेन । सर्व॑स्तोमेन यजे॑त । सर्व॑स्तोमेनेति सर्व - स्तो॒मेन॑ ।
यजे॑तेति । इति॑ यस्य॑ । यस्य॑ त्रिवृ॑तम् । त्रिवृ॑तमन्तर्य॑न्ति । त्रिवृ॑तमिति॑
त्रि - वृ॑तम् । अन्तर्य॑न्ति प्रा॒णान् । अन्तर्य॑न्तीत्यन्तः - यन्ति॑ ।
प्रा॒णास्तस्य॑ । प्रा॒णानिति॑ प्र - अनान् । तस्यान्तः । अन्तर्य॑न्ति ।
यन्ति॑ प्रा॒णेषु॑ । प्रा॒णेषु॑ मे । प्रा॒णेष्विति॑ प्र - अनेषु॑ । मेऽपि॑ ।
अप्य॑सत् । अस॑दिति । इति॑ खलु॑ । खलु॑ वै । वै यज्ञे॑न । यज्ञे॑न
यज॑मानः । यज॑मानो यज॑ते । यज॑ते यस्य॑ । यस्य॑ पञ्च॑दशम् ।
पञ्च॑दशमन्तर्य॑न्ति । पञ्च॑दशमिति॑ पञ्च - दशम् ।
अन्तर्य॑न्ति वी॒र्यम्॑ । अन्तर्य॑न्तीत्यन्तः - यन्ति॑ । वी॒र्यम्॑ तस्य॑ ।

सप्तम काण्डे – प्रथमः प्रश्नः (TS 7.1)

तस्यान्तः । अन्तर्यन्ति । यन्ति वीर्ये । वीर्ये मे । मेऽपि । अप्यसत् ।
असदिति । इति खलु । खलु वै । वै यज्ञेन । यज्ञेन यजमानः ।
यजमानो यजते । यजते यस्य । यस्य सप्तदशम् ।

सप्तदशमन्तर्यन्ति । सप्तदशमिति सप्त – दशम् ।

अन्तर्यन्ति प्रजाम् । अन्तर्यन्तीत्यन्तः – यन्ति । 8 (50/61)

TS 7.1.3.2 - Kramam

प्रजाम् तस्य । प्रजामिति प्र – जाम् । तस्यान्तः । अन्तर् यन्ति ।
यन्ति प्रजायाम् । प्रजायाम् मे । प्रजायामिति प्र – जायाम् । मेऽपि ।
अप्यसत् । असदिति । इति खलु । खलु वै । वै यज्ञेन । यज्ञेन
यजमानः । यजमानो यजते । यजते यस्य । यस्यैकविंशम् ।
एकविंशमन्तर्यन्ति । एकविंशमित्येक – विंशम् । अन्तर्यन्ति
प्रतिष्ठाम् । अन्तर्यन्तीत्यन्तः – यन्ति । प्रतिष्ठाम् तस्य । प्रतिष्ठामिति
प्रति – स्थाम् । तस्यान्तः । अन्तर् यन्ति । यन्ति प्रतिष्ठायाम् ।
प्रतिष्ठायाम् मे । प्रतिष्ठायामिति प्रति – स्थायाम् । मेऽपि । अप्यसत् ।
असदिति । इति खलु । खलु वै । वै यज्ञेन । यज्ञेन यजमानः ।
यजमानो यजते । यजते यस्य । यस्य त्रिणवम् । त्रिणवमन्तर्यन्ति ।

त्रि॒णव॑मि॒ति त्रि॑ – न॒वम् । अ॒न्त॒र्यन्त्य॑तून् । अ॒न्त॒र्यन्ती॑त्यन्तः – यन्ति॑ ।
 ऋ॒तूँश्च॑ । च॒ तस्य॑ । तस्य॑ नक्ष॒त्रिया॑म् । नक्ष॒त्रिया॑म् च ।
 च॒ वि॒राज॑म् । वि॒राज॑मन्तः । वि॒राज॑मि॒ति वि॒राज॑म् । अ॒न्त॒र् यन्ति॑ ।
 य॒न्त्य॒तुषु॑ । ऋ॒तुषु॑ मे । मेऽपि॑ । अ॒प्यस॑त् । अ॒सन् नक्ष॑त्रिया॒याम् ।
 नक्ष॑त्रिया॒याम् च॑ । च॒ वि॒राजि॑ । वि॒राजी॑ति () ।
 वि॒राजी॑ति वि॒ – रा॒जि । इति॑ खलु । 9 (50/60)

TS 7.1.3.3 - Kramam

खलु॑ वै । वै य॒ज्ञेन॑ । य॒ज्ञेन॑ यज॒मानः॑ । यज॒मानो॑ यज॒ते ।
 यज॒ते यस्य॑ । यस्य॑ त्रयस्त्रि॒ंशम् । त्रयस्त्रि॒ंशम॑न्तर्यन्ति॑ ।
 त्रयस्त्रि॒ंशमि॑ति त्रयः – त्रि॒ंशम् । अ॒न्त॒र्यन्ति॑ दे॒वताः॑ ।
 अ॒न्त॒र्यन्ती॑त्यन्तः – यन्ति॑ । दे॒वता॑स्तस्य॑ । तस्या॒न्तः । अ॒न्त॒र् यन्ति॑ ।
 यन्ति॑ दे॒वता॑सु । दे॒वता॑सु मे । मेऽपि॑ । अ॒प्यस॑त् । अ॒सदि॑ति ।
 इति॑ खलु । खलु॑ वै । वै य॒ज्ञेन॑ । य॒ज्ञेन॑ यज॒मानः॑ । यज॒मानो॑
 यज॒ते । यज॒ते यः । यो॑ वै । वै स्तो॒माना॑म् । स्तो॒माना॑मवमम् ।
 अ॒वम॑म् प॒रम॑ताम् । प॒रम॑ताम् गच्छ॒न्तम् । गच्छ॒न्तम् वैद॑ ।
 वेद॑ प॒रम॑ताम् । प॒रम॑तामे॒व । ए॒व गच्छ॑ति । गच्छ॑ति त्रि॒वृत् ।

त्रिवृद् वै । त्रिवृदिति त्रि – वृत् । वै स्तोमानाम् । स्तोमानामवमः ।
 अवमस्त्रिवृत् । त्रिवृत् परमः । त्रिवृदिति त्रि – वृत् । परमो यः ।
 य एवम् । एवम् वेद । वेद परमताम् । परमतामेव । एव गच्छति ।
 गच्छतीति गच्छति ॥ 10 (44/48)

(सप्तदशमन्तर्यन्ति – विराजीति – चतुश्चत्वारिंशच्च) (A3)

TS 7.1.4.1 - Kramam

अङ्गिरसो वै । वै सत्रम् । सत्रमासत । आसत ते । ते सुवर्गम् ।
 सुवर्गम् लोकम् । सुवर्गमिति सुवः – गम् । लोकमायन् ।
 आयन् तेषाम् । तेषां हविष्मान् । हविष्माश्च । च हविष्कृत् ।
 हविष्कृच् च । हविष्कृदिति हविः – कृत् । चाहीयेताम् ।
 अहीयेताम् तौ । तावकामयेताम् । अकामयेतां सुवर्गम् । सुवर्गम्
 लोकम् । सुवर्गमिति सुवः – गम् । लोकमियाव । इयावेति ।
 इति तौ । तावेतम् । एतम् द्विरात्रम् । द्विरात्रमपश्यताम् । द्विरात्रमिति
 द्वि-रात्रम् । अपश्यताम् तम् । तमा । आऽहरताम् । अहरताम् तेन ।
 तेनायजेताम् । अयजेताम् ततः । ततो वै । वै तौ । तौ सुवर्गम् ।
 सुवर्गम् लोकम् । सुवर्गमिति सुवः – गम् । लोकमैताम् ।

ऐ॒ताम् यः॑ । य ए॒वम् । ए॒वम् वि॒द्वान् । वि॒द्वान् द्वि॒रात्रे॑ण । द्वि॒रात्रे॑ण
यज॑ते । द्वि॒रात्रे॑णेति॒ द्वि - रा॒त्रेण॑ । यज॑ते सु॒वर्गम् । सु॒वर्गमे॒व ।
सु॒वर्गमि॑ति सु॒वः - गम् । ए॒व लो॒कम् । लो॒कमे॑ति । ए॒ति तौ ।
तावै॑ताम् । ऐ॒ताम् पूर्वे॑ण । पूर्वे॑णा॒ह्वा । अ॒ह्वाऽग॑च्छताम् ।
अ॒ग॑च्छता॒मुत्तरे॑ण । उत्तरे॑णाभि॒प्लवः॑ ।

उत्तरे॑णेत्युत् - तरे॑ण । 11 (50/58)

TS 7.1.4.2 - Kramam

अभि॒प्लवः॑ पूर्वम् । अभि॒प्लव इ॒त्यभि - प्लवः॑ । पूर्व॑महः ।
अ॒हर् भ॑वति । भ॒वति॒ गतिः॑ । गति॒रुत्तर॑म् । उत्तर॑म् ज्योति॒ष्ठोमः॑ ।
उत्तर॑मित्युत् - तर॑म् । ज्योति॒ष्ठोमोऽग्नि॑ष्ठोमः । ज्योति॒ष्ठोम इति॑
ज्योतिः॑ - स्तोमः॑ । अ॒ग्नि॒ष्ठोमः॑ पूर्वम् । अ॒ग्नि॒ष्ठोम
इ॒त्यग्नि॑ - स्तोमः॑ । पूर्व॑महः । अ॒हर् भ॑वति । भ॒वति॒ तेजः॑ ।
तेज॑स्तेन । तेना॒व । अ॒व रु॒न्धे । रु॒न्धे सर्व॑स्तोमः ।
सर्व॑स्तोमोऽति॒रात्रः॑ । सर्व॑स्तोम इति॒ सर्व - स्तोमः॑ ।
अ॒ति॒रात्र उत्तर॑म् । अ॒ति॒रात्र इ॒त्यति॑ - रा॒त्रः । उत्तर॑ सर्व॑स्य ।
उत्तर॑मित्युत् - तर॑म् । सर्व॑स्याप्त्यै । आ॒प्त्यै सर्व॑स्य ।

सप्तम काण्डे – प्रथमः प्रश्नः (TS 7.1)

सर्वस्यावरुद्ध्यै । अवरुद्ध्यै गायत्रम् । अवरुद्ध्यै इत्यव-रुद्ध्यै ।
गायत्रम् पूर्वे । पूर्वेऽहन् । अहन्त् साम । साम भवति । भवति
तेजः । तेजो वै । वै गायत्री । गायत्री गायत्री । गायत्री ब्रह्मवर्चसम् ।
ब्रह्मवर्चसम् तेजः । ब्रह्मवर्चसमिति ब्रह्म - वर्चसम् । तेज एव ।
एव ब्रह्मवर्चसम् । ब्रह्मवर्चसमात्मन् । ब्रह्मवर्चसमिति
ब्रह्म - वर्चसम् । आत्मन् धत्ते । धत्ते त्रैष्टुभम् । त्रैष्टुभमुत्तरे । उत्तर
ओजः । उत्तर इत्युत्-तरे । ओजो वै । वै वीर्यम् । वीर्यम् त्रिष्टुक् ।
त्रिष्टुगोजः । ओज एव । एव वीर्यम् । वीर्यमात्मन् । आत्मन् धत्ते ।
धत्ते रथन्तरम् । रथन्तरम् पूर्वे । रथन्तरमिति रथम् - तरम् ।
पूर्वेऽहन् । 12 (50/62)

TS 7.1.4.3 - Kramam

अहन्त् साम । साम भवति । भवतीयम् । इयम् वै । वै रथन्तरम् ।
रथन्तरमस्याम् । रथन्तरमिति रथम् - तरम् । अस्यामेव । एव प्रति ।
प्रति तिष्ठति । तिष्ठति बृहत् । बृहदुत्तरे । उत्तरेऽसौ । उत्तर
इत्युत् - तरे । असौ वै । वै बृहत् । बृहदमुष्याम् । अमुष्यामेव ।
एव प्रति । प्रति तिष्ठति । तिष्ठति तत् । तदाहुः । आहुः क्व ।

क्व॑ जगती॑ । जगती॑ च॑ । चानु॑ष्टुप् । अनु॑ष्टुप् च॑ ।
 अनु॑ष्टुबित्यनु॑ – स्तुप् । चेति॑ । इति॑ वैखान॑सम् । वैखान॑सम् पूर्वे॑ ।
 पूर्वे॑ऽहन् । अहन्थ्॑ साम॑ । साम॑ भवति॑ । भवति॑ तेन॑ । तेन॑ जगत्यै॑ ।
 जगत्यै॑ न । नैति॑ । एति॑ षोड॑शि । षोड॑श्युत्तरे॑ । उत्तरे॑ तेन॑ । उत्तर॑
 इत्युत् – तरे॑ । तेनानु॑ष्टुभः । अनु॑ष्टुभोऽथ॑ । अनु॑ष्टुभ॒ इत्यनु॑-स्तुभः ।
 अथाहुः॑ । आहु॑र् यत् । यथ्॑ समा॑ने । समा॑नेऽर्द्धमा॑से ।
 अर्द्धमा॑से स्याता॑म् । अर्द्धमा॑स इत्यर्द्ध॑ – मा॒से । स्याता॑मन्यतर॑स्य ।
 अन्य॑तरस्याहः॑ । अहो॑ वीर्य॑म् । वीर्य॑मनु॑ () । अनु॑ पद्येत॑ ।
 पद्ये॑तेति॑ । इत्यमा॑वास्यायाम् । अमा॑वास्यायाम् पूर्व॑म् ।
 अमा॑वास्यायामित्यमा॑ – वास्यायाम् । पूर्व॑महः॑ । अहर्॑ भवति॑ ।
 भवत्यु॑त्तरस्मिन् । उत्तर॑स्मिन्नुत्तर॑म् । उत्तर॑स्मिन्नित्युत् – तर॑स्मिन् ।
 उत्तर॑म् नाना॑ । उत्तर॑मित्युत् – तर॑म् । नानै॒व । ए॒वा॒र्द्धमा॑सयोः॑ ।
 अर्द्धमा॑सयोर् भवतः॑ । अर्द्धमा॑सयोरित्यर्द्ध॑ – मा॒सयोः॑ । भवतो॑
 नाना॑वीर्ये । नाना॑वीर्ये भवतः॑ । नाना॑वीर्ये इति॑ नाना॑ – वीर्ये॑ ।
 भवतो॑ ह॒विष्म॑न्निधनम् । ह॒विष्म॑न्निधनम् पूर्व॑म् ।

सप्तम काण्डे – प्रथमः प्रश्नः (TS 7.1)

ह॒वि॒ष्मन्नि॒धन॒मिति॑ ह॒वि॒ष्मत् – नि॒धन॒म् । पूर्॒वम॒हः । अ॒हर् भ॒वति॑ ।
भ॒वति॑ ह॒वि॒ष्कृन्नि॒धन॒म् । ह॒वि॒ष्कृन्नि॒धन॒मुत्त॑रम् । ह॒वि॒ष्कृन्नि॒धन॒मिति॑
ह॒वि॒ष्कृत् – नि॒धन॒म् । उत्त॑रम् प्र॒ति॒ष्ठित्यै॑ । उत्त॑र॒मित्यु॑त् – त॒रम् ।
प्र॒ति॒ष्ठित्या॒ इति॑ प्र॒ति – स्थि॒त्यै ॥ 13 (71/85)

(उत्त॑रेण – रथ॒न्तर॒म् पूर्वे॑ – ऽन्वे – क॒वि॒श्र॒तिश्च॑) (A4)

TS 7.1.5.1 - Kramam

आ॒पो वै । वा इ॒दम् । इ॒दम॒ग्रे ॥ अ॒ग्रे स॒लि॒लम् । स॒लि॒लमा॑सीत् ।
आ॒सीत् तस्मि॑न् । तस्मि॑न् प्र॒जाप॑तिः । प्र॒जाप॑तिर् वा॒युः ।
प्र॒जाप॑तिरिति॑ प्र॒जा – प॑तिः । वा॒युर् भू॒त्वा । भू॒त्वाऽच॑रत् । अ॒च॒रत्
सः । स इ॒माम् । इ॒माम॑पश्यत् । अ॒प॒श्य॒ताम् । ताम् व॑रा॒हः । व॒रा॒हो
भू॒त्वा । भू॒त्वाऽह॑रत् । आऽह॑रत् । अ॒ह॒रत् ताम् । ताम् वि॒श्वक॑र्मा ।
वि॒श्वक॑र्मा भू॒त्वा । वि॒श्वक॑र्मेति॑ वि॒श्व – क॑र्मा । भू॒त्वा वि॒ । व्य॑मार्त् ।
अ॒मार्त् सा॒ । साऽप्र॑थत । अ॒प्र॒थत॑ सा॒ । सा पृ॑थि॒वी ।
पृ॒थि॒व्य॒भव॑त् । अ॒भव॑त् तत् । तत् पृ॒थि॒व्यै । पृ॒थि॒व्यै पृ॒थि॒वित्व॑म् ।
पृ॒थि॒वित्व॑म् तस्या॑म् । पृ॒थि॒वित्व॑मिति॑ पृ॒थि॒वि – त्व॑म् ।
तस्या॑मश्राम्यत् । अ॒श्राम्य॑त् प्र॒जाप॑तिः । प्र॒जाप॑तिः सः ।

प्र॒जाप॑तिरि॒ति प्र॒जा – प॒तिः । स दे॒वान् । दे॒वान॑सृ॒जत॑ ।
 अ॒सृ॒जत॑ व॒सून् । व॒सून् रु॒द्रान् । रु॒द्राना॑दि॒त्यान् । आ॒दि॒त्यान् ते॑ ।
 ते दे॒वाः । दे॒वाः प्र॒जाप॑तिम् । प्र॒जाप॑तिमब्रुवन् । प्र॒जाप॑तिमि॒ति
 प्र॒जा – प॒तिम् । अ॒ब्रुव॑न् प्र । प्र जा॒याम॑है । जा॒याम॑हा इति॑ ।
 इति॑ सः । सोऽब्र॑वीत् । अ॒ब्रवी॑द् यथा॑ । 14 (50/55)

TS 7.1.5.2 - Kramam

यथा॑हम् । अ॒हम् यु॒ष्मान् । यु॒ष्माऽस्त॑पसा । तप॒साऽसृ॑क्षि ।
 अ॒सृ॒क्ष्ये॒वम् । ए॒वम् तप॑सि । तप॑सि प्र॒जन॑नम् । प्र॒जन॑नमिच्छ॒ध्वम् ।
 प्र॒जन॑नमि॒ति प्र – जन॑नम् । इच्छ॒ध्वमि॒ति । इति॑ ते॒भ्यः ।
 ते॒भ्योऽग्नि॑म् । अ॒ग्निमा॑यत॒नम् । आ॒यत॑नम् प्र ।
 आ॒यत॑नमि॒त्या – यत॑नम् । प्राय॑च्छत् । अ॒यच्छ॑दे॒तेन॑ । ए॒तेना॑यत॒नेन॑ ।
 आ॒यत॑नेन श्राम्यत । आ॒यत॑नेने॒त्या – यत॑नेन । श्राम्य॑तेति॑ । इति॑ ते ।
 तेऽग्नि॑ना । अ॒ग्निना॑ऽयत॒नेन॑ । आ॒यत॑नेनाश्राम्यन् ।
 आ॒यत॑नेने॒त्या – यत॑नेन । अ॒श्राम्य॑न् ते । ते स॒म् व॑त्स॒रे । स॒म् व॑त्स॒र
 ए॒काम् । स॒म् व॑त्स॒र इति॑ स॒म्-व॑त्स॒रे । ए॒काम् गा॑म् । गा॒मसृ॑जन्त ।
 अ॒सृ॒जन्त॑ ता॒म् । ता॒म् व॑सु॒भ्यः । व॑सु॒भ्यो रु॒द्रे॒भ्यः ।

सप्तम काण्डे – प्रथमः प्रश्नः (TS 7.1)

वसु॑भ्य॒ इति॑ वसु॑ – भ्यः॒ । रु॒द्रेभ्य॑ आ॒दित्ये॑भ्य॒ । आ॒दित्ये॑भ्यः॒ प्र ।
प्राय॑च्छन् । अ॒यच्छन्ने॑ताम् । ए॒ताञ् रक्ष॑द्ध्वम् । रक्ष॑द्ध्वमि॒ति ।
इति॑ ताम् । ताम् व॑सवः । वसवो॑ रु॒द्राः । रु॒द्रा आ॒दित्याः॑ ।
आ॒दित्या॑ अरक्षन्त । अ॒रक्षन्त॑ सा । सा वसु॑भ्यः । वसु॑भ्यो रु॒द्रेभ्यः॑ ।
वसु॑भ्य॒ इति॑ वसु॑ – भ्यः॒ । रु॒द्रेभ्य॑ आ॒दित्ये॑भ्यः॒ । आ॒दित्ये॑भ्यः॒ प्र ।
प्राजा॑यत । अ॒जायत॑ त्रीणि । त्रीणि॑ च । च श॑तानि । 15 (50/57)

TS 7.1.5.3 - Kramam

श॑तानि त्रयस्त्रिं॑शतम् । त्रयस्त्रिं॑शतम् च । त्रयस्त्रिं॑शतमि॒ति
त्रयः॑ – त्रिं॑शतम् । चाथ॑ । अथ॑ सा । सैव । ए॒व स॑हस्रत॒मी ।
स॑हस्रत॒म्यभवत् । स॑हस्रत॒मीति॑ सहस्र – त॒मी । अ॒भवत् ते ।
ते दे॒वाः । दे॒वाः प्र॒जाप॑तिम् । प्र॒जाप॑तिमब्रुवन् । प्र॒जाप॑तिमि॒ति
प्र॒जा – प॑तिम् । अ॒ब्रुव॑न्त् स॒हस्रे॑ण । स॒हस्रे॑ण नः । नो या॒जय॑ ।
या॒जये॑ति । इति॑ सः । सौ॑ऽग्नि॒ष्टोमे॑न । अ॒ग्नि॒ष्टोमे॑न वसून् ।
अ॒ग्नि॒ष्टोमे॑नेत्यग्नि – स्तो॒मेन॑ । वसू॑नयाजयत् । अ॒याज॑यत् ते ।
त इ॒मम् । इ॒मम् लो॒कम् । लो॒कम॑जयन् । अ॒जय॑न् तत् । तच् च॑ ।
चाद॒दुः । अ॒ददुः॑ सः । स उ॒क्थ्ये॑न । उ॒क्थ्ये॑न रु॒द्रान् ।

रु॒द्रान॑याजयत् । अ॒याज॑यत् ते । ते॒ऽन्तरि॑क्षम् । अ॒न्तरि॑क्षमजयन् ।
 अ॒जय॑न् तत् । तच् च । चा॒ददुः । अ॒ददुः सः । सोऽति॑रात्रेण ।
 अ॒तिरा॑त्रेणादि॒त्यान् । अ॒तिरा॑त्रेणे॒त्यति॑ – रा॒त्रेण॑ । आदि॒त्यान॑याजयत् ।
 अ॒याज॑यत् ते । ते॒ऽमुम् । अ॒मुम् लो॒कम् । लो॒कम॑जयन् ।
 अ॒जय॑न् तत् । तच् च । चा॒ददुः । अ॒ददु॑स्तत् । तद॒न्तरि॑क्षम् ।
 अ॒न्तरि॑क्षम् व्य॒वैर्य॑त ॥ 16 (50/55)

TS 7.1.5.4 - Kramam

व्य॒वैर्य॑त तस्मात् । व्य॒वैर्य॑तेति॒ वि – अवै॑र्यत । तस्माद् रु॒द्राः ।
 रु॒द्रा घा॑तुकाः । घा॑तुका अनाय॒तनाः । अना॑य॒तना हि॑ । अना॑य॒तना
 इत्य॑ना – य॒तनाः । हि तस्मात् । तस्मादाहुः । आहुः शि॒थिल॑म् ।
 शि॒थिल॑म् वै । वै म॒द्ध्य॑मम् । म॒द्ध्य॑ममहः । अह॑स्त्रिरा॒त्रस्य॑ ।
 त्रिरा॒त्रस्य॑ वि । त्रिरा॒त्रस्येति॑ त्रि – रा॒त्रस्य॑ । वि हि । हि तत् ।
 तद॒वैर्य॑त । अवै॒र्यतेति॑ । अवै॒र्यतेत्य॑व – ऐर्य॑त । इति॒ त्रैष्टु॑भम् ।
 त्रैष्टु॑भम् म॒द्ध्य॑मस्य । म॒द्ध्य॑मस्याहः । अह॑ आज्यम् । आज्यम्
 भव॑ति । भव॑ति स॒म्या॑नानि । स॒म्या॑नानि सू॒क्तानि॑ । स॒म्या॑नानीति॑
 सम् – या॑नानि । सू॒क्तानि॑ श॒सति॑ । सू॒क्तानीति॑ सु – उ॒क्तानि॑ ।

श॒ञ्स॒ति षोड॒शि॒नम् । षोड॒शि॒नञ् श॒ञ्स॒ति । श॒ञ्स॒त्यहः॑ ।
 अ॒हो धृ॒त्यै॑ । धृ॒त्या अ॒शि॒थि॒लम्भा॒वाय॑ । अ॒शि॒थि॒लम्भा॒वाय॑ तस्मा॒त् ।
 अ॒शि॒थि॒लम्भा॒वाये॒त्य॒शि॒थि॒लम् – भा॒वाय॑ । तस्मा॒त् त्रि॒रा॒त्रस्य॑ ।
 त्रि॒रा॒त्रस्या॒ग्नि॒ष्टोमः॑ । त्रि॒रा॒त्रस्येति॑ त्रि – रा॒त्रस्य॑ । अ॒ग्नि॒ष्टोम॑ ए॒व ।
 अ॒ग्नि॒ष्टोम॑ इ॒त्य॒ग्नि – स्तो॒मः । ए॒व प्र॒थम॑म् । प्र॒थम॑महः ।
 अ॒हः स्या॒त् । स्या॒दथ॑ । अथो॒क्थ्यः॑ । उ॒क्थ्योऽथ॑ । अथा॒ति॒रा॒त्रः ।
 अ॒ति॒रा॒त्र ए॒षाम् । अ॒ति॒रा॒त्र इ॒त्य॒ति – रा॒त्रः । ए॒षाम् लो॒का॒नाम्॑ ।
 लो॒का॒नाम् वि॒धृत्यै॑ । वि॒धृत्यै॑ त्री॒णि॒त्री॒णि । वि॒धृत्या॒ इति॑ वि॒धृत्यै॑ ।
 त्री॒णि॒त्री॒णि श॒तानि॑ । त्री॒णि॒त्री॒णीति॑ त्री॒णि – त्री॒णि ।
 श॒तान्य॑नू॒ची॒नाह॑म् । अ॒नू॒ची॒नाह॑मव्यवच्छिन्नानि ।
 अ॒नू॒ची॒नाह॑मित्य॒नू॒ची॒न – अ॒हम् । अ॒व्य॒व॒च्छि॒न्नानि॑ द॒दाति॑ ।
 अ॒व्य॒व॒च्छि॒न्नानी॒त्य॒वि – अ॒व॒च्छि॒न्नानि॑ । द॒दात्ये॒षाम् । 17 (50/64)

TS 7.1.5.5 - Kramam

ए॒षाम् लो॒का॒नाम्॑ । लो॒का॒ना॒मनु॑ । अ॒नु स॒न्त॒त्यै॑ । स॒न्त॒त्यै॑ द॒श॒तम्॑ ।
 स॒न्त॒त्या इति॑ स॒म् – त॒त्यै॑ । द॒श॒तम् न । न वि॑ । वि॒च्छि॒न्धा॒त् ।
 छि॒न्धा॒द् वि॒राज॑म् । वि॒राज॑म् न । वि॒राज॑मिति॑ वि – रा॒जम्॑ । ने॒त् ।

इद् विच्छिन॑दानि । विच्छिन॑दानीति॑ । विच्छिन॑दानीति॑ वि-छिन॑दानि ।
 इत्यथ॑ । अथ॑ या । या सह॑स्रतमी । सह॑स्रतम्यासीत् । सह॑स्रतमीति॑
 सह॑स्र - तमी । आसीत् तस्याम् । तस्यामिन्द्रः॑ । इन्द्रश्च॑ ।
 च विष्णुः॑ । विष्णुश्च॑ । च व्यायच्छेताम् । व्यायच्छेता॑ सः ।
 व्यायच्छेतामिति॑ वि - आयच्छेताम् । स इन्द्रः॑ । इन्द्रोऽमन्यत॑ ।
 अमन्यतानया॑ । अनया॑ वै । वा इदम् । इदम् विष्णुः॑ । विष्णुः॑
 सह॑स्रम् । सह॑स्रम् वक्ष्यते॑ । वक्ष्यत॑ इति॑ । इति॑ तस्याम् ।
 तस्यामकल्पेताम् । अकल्पेताम् द्विभागे॑ । द्विभाग॑ इन्द्रः॑ । द्विभाग॑ इति॑
 द्वि - भागे॑ । इन्द्रस्तृतीये॑ । तृतीये॑ विष्णुः॑ । विष्णुस्तत् । तद् वै ।
 वा एषा॑ । एषाऽभ्यनूच्यते॑ । अभ्यनूच्यत॑ उभा । अभ्यनूच्यत॑
 इत्यभि - अनूच्यते॑ । उभा॑ जिग्यथुः॑ । जिग्यथुरिति॑ । इति॑ ताम् ।
 ताम् वै । वा एताम् । एतामच्छावाकः॑ ।

अच्छावाक॑ एव । 18 (50/57)

TS 7.1.5.6 - Kramam

एव श॑सति । श॑सत्यथ॑ । अथ॑ या । या सह॑स्रतमी । सह॑स्रतमी
 सा । सह॑स्रतमीति॑ सह॑स्र - तमी । सा होत्रे॑ । होत्रे॑ देया॑ । देयेति॑ ।

इति॑ हो॒ता॒रम् । हो॒ता॒रम् वै । वा अ॒भ्यति॑रिच्यते । अ॒भ्यति॑रिच्यते
यत् । अ॒भ्यति॑रिच्यत इत्य॑भि – अति॑रिच्यते । यदति॑रिच्यते ।
अति॑रिच्यते हो॒ता॒ । अति॑रिच्यत इत्य॑ति – रिच्य॑ते । हो॒ता॒ऽना॒प्तस्य॑ ।
अना॒प्तस्या॑पयि॒ता । आ॒पयि॒ताऽथ॑ । अथाहुः॑ । आ॒हु॒रु॒न्ने॒त्रे । उ॒न्ने॒त्रे
देया॑ । उ॒न्ने॒त्र इत्यु॑त् – ने॒त्रे । देये॑ति । इत्य॑तिरिक्ता । अति॑रिक्ता वै ।
अति॑रिक्तेत्य॑ति – रिक्ता॑ । वा ए॒षा । ए॒षा सह॑स्रस्य ।
सह॑स्रस्याति॑रिक्तः । अति॑रिक्त उ॒न्ने॒ता । अति॑रिक्त इत्य॑ति – रिक्तः॑ ।
उ॒न्ने॒त॒र्त्वि॒जाम् । उ॒न्ने॒तेत्यु॑त् – ने॒ता । ऋ॒त्वि॒जाम॑थ । अथाहुः॑ ।
आ॒हुः सर्वे॑भ्यः । सर्वे॑भ्यः सद॒स्यै॑भ्यः । सद॒स्यै॑भ्यो देया॑ । देये॑ति ।
इत्य॑थ । अथाहुः॑ । आ॒हु॒रु॒दाकृ॑त्या । उ॒दाकृ॑त्या सा ।
उ॒दाकृ॑त्येत्यु॑त् – आ॒कृ॒त्या । सा व॑शम् । व॑शम् चरेत् । चरे॑दिति ।
इत्य॑थ । अथाहुः॑ । आ॒हु॒र्ब्र॑ह्मणै॑ । ब्र॑ह्मणै॑ च । चा॒ग्नी॒धे ।
अ॒ग्नी॒धे च॑ । अ॒ग्नी॒ध इत्य॑ग्नि – इ॒धे । च॑ देया॑ । देये॑ति () ।
इति॑ द्वि॒भागम् । 19 (50/59)

TS 7.1.5.7 - Kramam

द्वि॑भागम् ब्र॒ह्म॒ण॑ । द्वि॑भाग॒मि॒ति॒ द्वि॑ - भा॒गम् । ब्र॒ह्म॒ण॑ तृ॒तीयम् ।
तृ॒तीय॑म॒ग्नी॒धे॑ । अ॒ग्नी॒ध॑ ऐ॒न्द्रः । अ॒ग्नी॒ध॑ इ॒त्य॒ग्नि॑ - इ॒धे॑ । ऐ॒न्द्रो॑ वै ।
वै ब्र॒ह्मा । ब्र॒ह्मा वै॒ष्ण॒वः । वै॒ष्ण॒वो॑ऽग्नी॒त् । अ॒ग्नी॒द् यथा॑ ।
अ॒ग्नी॒दि॒त्य॒ग्नि॑ - इ॒त् । यथै॒व । ए॒व तौ । ताव॑क॒ल्पे॒ताम् ।
अ॒क॒ल्पे॒ता॒मि॒ति॒ । इ॒त्यथ॑ । अथाहुः । आ॒हुर् या । या क॒ल्या॒णी ।
क॒ल्या॒णी बहु॑रूपा । बहु॑रूपा सा । बहु॑रूपेति॑ बहु - रूपा ।
सा दे॒या । दे॒येति॑ । इ॒त्यथ॑ । अथाहुः । आ॒हुर् या । या द्वि॑रूपा ।
द्वि॑रूपो॒भय॑त॒एनी॑ । द्वि॑रूपेति॑ द्वि - रूपा । उ॒भय॑त॒एनी॑ सा ।
उ॒भय॑त॒एनी॒त्यु॒भय॑तः - ए॒नी । सा दे॒या । दे॒येति॑ । इति॑ स॒हस्र॑स्य ।
स॒हस्र॑स्य परि॑गृहीत्यै । परि॑गृहीत्यै तत् । परि॑गृहीत्या इति॑
परि॑ - गृहीत्यै । तद् वै । वा ए॒तत् । ए॒तथ् स॒हस्र॑स्य ।
स॒हस्र॑स्यायनम् । अ॒यन॑ः स॒हस्र॑म् । स॒हस्र॑ऽस्तो॒त्रीयाः॑ ।
स्तो॒त्रीयाः॑ स॒हस्र॑म् । स॒हस्र॑म् दक्षि॑णाः । दक्षि॑णाः स॒हस्र॑स॒म्मितः॑ ।
स॒हस्र॑स॒म्मितः॑ सु॒वर्गः॑ । स॒हस्र॑स॒म्मित॑ इति॑ स॒हस्र॑ - स॒म्मितः॑ ।
सु॒वर्गा॑ लो॒कः । सु॒वर्ग॑ इति॑ सु॒वः - गः । लो॒कः सु॒वर्ग॑स्य ।

सु॒वर्ग॑स्य लो॒कस्य॑ । सु॒वर्ग॑स्येति सुवः-गस्य । लो॒कस्या॒भिजि॑त्यै ।
अ॒भिजि॑त्या इत्य॒भि - जि॒त्यै ॥ 20 (47/57)

(अ॒ब्रवी॑ - च्च - तद॒न्तरि॑क्षम् - ददा॒त्य - च्छा॒वाक - श्च दे॒येति॑
- सप्त॑च॒त्वारि॑ञ्च) (A5)

TS 7.1.6.1 - Kramam

सोमो॑ वै । वै स॒हस्र॑म् । स॒हस्र॑मविन्दत् । अ॒विन्द॑त् तम् । तमिन्द्रः॑ ।
इन्द्रो॑ऽनु । अ॒न्ववि॑न्दत् । अ॒विन्द॑त् तौ । तौ यमः॑ । यमो न्यागच्छत् ।
न्याग॑च्छत् तौ । न्याग॑च्छदिति नि - आगच्छत् । ताव॑ब्रवीत् ।
अ॒ब्रवी॑दस्तु । अस्तु॑ मे । मेऽत्र॑ । अत्रा॑पि । अपी॑ति । इत्यस्तु॑ ।
अस्तु॑ ही(३) । ही(३) इति॑ । इत्य॑ब्रूताम् । अ॒ब्रूता॑ञ् सः । स यमः॑ ।
यम॑ एकस्याम् । एक॑स्याम् वी॒र्यम्॑ । वी॒र्यम्॑ परि । पर्य॑पश्यत् ।
अप॑श्यदियम् । इ॒यम् वै । वा अ॒स्य । अ॒स्य स॒हस्र॑स्य । स॒हस्र॑स्य
वी॒र्यम्॑ । वी॒र्यम्॑ बिभर्ति॑ । बि॒भर्ती॑ति । इति॑ तौ । ताव॑ब्रवीत् ।
अ॒ब्रवी॑दियम् । इ॒यम् मम॑ । ममास्तु॑ । अ॒स्त्वेत॑त् । ए॒तद् यु॒वयोः॑ ।
यु॒वयो॑रिति । इति॑ तौ । ताव॑ब्रूताम् । अ॒ब्रूता॑ञ् सर्वे॑ । सर्वे॑ वै ।

वा ए॒तत् । ए॒तदे॒तस्याम् । ए॒तस्याम् वी॒र्यम् ।

वी॒र्यम् परि । 21 (50/51)

TS 7.1.6.2 - Kramam

परि प॒श्यामः । प॒श्यामोऽ॒शम् । अ॒श॒मा । आ ह॒राम॑है । ह॒राम॑हा
इति । इति तस्याम् । तस्याम॒शम् । अ॒श॒मा । आऽह॑रन्त ।

अ॒ह॒रन्त॑ ताम् । ताम॒प्सु । अ॒प्सु प्र । अ॒प्सि॒स्वत्य॑प् - सु ।

प्रावे॑शयन् । अ॒वे॒श॒यन्थ् सो॒माय॑ । सो॒मा॒योदे॑हि । उदे॑हीति ।

उदे॑हीत्युत् - एहि । इति सा । सा रोहि॑णी । रोहि॑णी पिङ्ग॒ला ।

पिङ्ग॒लैक॑हायनी । एक॑हायनी रू॒पम् । एक॑हायनीत्येक - हा॒यनी॑ ।

रू॒पम् कृ॒त्वा । कृ॒त्वा त्रय॑स्त्रि॒श॒ता । त्रय॑स्त्रि॒श॒ता च ।

त्रय॑स्त्रि॒श॒तेति॑ त्रयः - त्रि॒श॒ता । च त्रि॒भिः । त्रि॒भिश्च॑ । त्रि॒भिरि॑ति

त्रि - भिः । च श॒तैः । श॒तैः सह॑ । स॒होदै॑त् । उदै॑त् तस्मात् ।

उदै॑दित्युत् - ऐत् । तस्माद् रोहि॑ण्या । रोहि॑ण्या पिङ्ग॒लया॑ ।

पिङ्ग॒लयैक॑हायन्या । एक॑हायन्या सोमम् ।

एक॑हायन्येत्येक - हा॒यन्या॑ । सोमम् क्रीणी॑यात् । क्रीणी॑याद् यः ।

य ए॒वम् । ए॒वम् वि॒द्वान् । वि॒द्वान् रोहि॑ण्या । रोहि॑ण्या पिङ्ग॒लया॑ ।

पिङ्गल॑यै॒कहा॑य॒न्या । एक॑हा॒य॒न्या सोम॑म् ।
 एक॑हा॒य॒न्येत्ये॒क – हा॒य॒न्या । सोम॑म् क्री॒णाति॑ ।
 क्री॒णाति॑ त्रय॒स्त्रिंश॑ता । त्रय॒स्त्रिंश॑ता च । त्रय॒स्त्रिंश॑तेति
 त्रयः॑ – त्रिंश॒ता । चै॒व । ए॒वास्य॑ । अ॒स्य त्रि॒भिः । त्रि॒भिश्च॑ ।
 त्रि॒भिरि॑ति त्रि – भिः । च श॒तैः । 22 (50/60)

TS 7.1.6.3 - Kramam

श॒तैः सोमः॑ । सोमः॑ क्री॒तः । क्री॒तो भव॑ति । भव॑ति सु॒क्री॒तेन॑ ।
 सु॒क्री॒तेन॑ यज॑ते । सु॒क्री॒तेनेति॑ सु-क्री॒तेन॑ । यज॑ते ताम् । ताम॑प्सु ।
 अ॒प्सु प्र । अ॒प्सिस्व॑त्यप् – सु । प्रा॒वेश॑यन् । अ॒वेश॑यन्निन्द्रा॒य ।
 इन्द्रा॑यो॒देहि॑ । उ॒देही॑ति । उ॒देही॑त्युत्-ए॒हि । इति॑ सा । सा रोहि॑णी ।
 रोहि॑णी लक्ष्म॒णा । लक्ष्म॒णा प॑ष्ठौही । प॑ष्ठौही वार्त्र॒घ्नी ।
 वार्त्र॒घ्नी रू॒पम् । वार्त्र॒घ्नीति॑ वार्त्र – घ्नी । रू॒पम् कृ॒त्वा ।
 कृ॒त्वा त्रय॒स्त्रिंश॑ता । त्रय॒स्त्रिंश॑ता च । त्रय॒स्त्रिंश॑तेति
 त्रयः॑ – त्रिंश॒ता । च त्रि॒भिः । त्रि॒भिश्च॑ । त्रि॒भिरि॑ति त्रि – भिः ।
 च श॒तैः । श॒तैः स॒ह । स॒होदै॑त् । उ॒दैत् तस्मा॑त् । उ॒दैदित्यु॑त्-ऐत् ।
 तस्मा॑द् रोहि॑णीम् । रोहि॑णीम् लक्ष्म॒णाम् । लक्ष्म॒णाम् प॑ष्ठौहीम् ।

प॒ष्ठौ॒ही॒म् वा॒र्त्र॒घ्नी॒म् । वा॒र्त्र॒घ्नी॒म् द॒द्यात् । वा॒र्त्र॒घ्नी॒मि॒ति वा॒र्त्र-घ्नी॒म् ।
द॒द्याद् यः । य ए॒वम् । ए॒वम् वि॒द्वान् । वि॒द्वान् रो॒हिणी॒म् । रो॒हिणी॒म्
ल॒क्ष्म॒णाम् । ल॒क्ष्म॒णाम् प॒ष्ठौ॒ही॒म् । प॒ष्ठौ॒ही॒म् वा॒र्त्र॒घ्नी॒म् । वा॒र्त्र॒घ्नी॒म्
द॒दा॒ति । वा॒र्त्र॒घ्नी॒मि॒ति वा॒र्त्र - घ्नी॒म् । द॒दा॒ति त्र॒यस्त्रिं॒शत् ।
त्र॒यस्त्रिं॒शच्च । त्र॒यस्त्रिं॒शदि॒ति त्र॒यः - त्रिं॒शत् । चै॒व ।
ए॒वा॒स्य । अ॒स्य त्री॒णि । त्री॒णि च । च श॒तानि॒ । श॒तानि॒ सा ।
सा द॒त्ता । द॒त्ता भ॒वति॒ । 23 (50/60)

TS 7.1.6.4 - Kramam

भ॒वति॒ ता॒म् । ता॒मप्सु॒ । अ॒प्सु प्र॒ । अ॒प्स्वि॒त्यप्-सु॒ । प्रा॒वे॒शय॒न् ।
अ॒वे॒शय॒न् । य॒माय॒ । य॒मायो॒देहि॒ । उ॒देही॒ति । उ॒देही॒त्युत् - ए॒हि ।
इ॒ति सा॒ । सा ज॒रती॒ । ज॒रती॒ मूर्खा॒ । मूर्खा॒ तज्ज॒घन्या॒ ।
तज्ज॒घन्या॒ रू॒पम् । तज्ज॒घन्ये॒ति तत् - ज॒घन्या॒ । रू॒पम् कृ॒त्वा ।
कृ॒त्वा त्र॒यस्त्रिं॒शता॒ । त्र॒यस्त्रिं॒शता॒ च । त्र॒यस्त्रिं॒शते॒ति
त्र॒यः - त्रिं॒शता॒ । च त्रि॒भिः । त्रि॒भिश्च॒ । त्रि॒भिरि॒ति त्रि॒ - भिः॒ ।
च श॒तैः । श॒तैः स॒ह । स॒होदै॒त् । उ॒दैत् तस्मा॑त् ।
उ॒दैदित्यु॑त् - ऐ॒त् । तस्मा॑ज् ज॒रती॒म् । ज॒रती॒म् मूर्खा॑म् ।

मूर्खाम् तज्जघन्याम् । तज्जघन्यामनुस्तरणीम् ।
 तज्जघन्यामिति तत् – जघन्याम् । अनुस्तरणीम् कुर्वीत ।
 अनुस्तरणीमित्यनु – स्तरणीम् । कुर्वीत यः । य एवम् । एवम्
 विद्वान् । विद्वान् जरतीम् । जरतीम् मूर्खाम् । मूर्खाम् तज्जघन्याम् ।
 तज्जघन्यामनुस्तरणीम् । तज्जघन्यामिति तत् – जघन्याम् ।
 अनुस्तरणीम् कुरुते । अनुस्तरणीमित्यनु – स्तरणीम् ।
 कुरुते त्रयस्त्रिंशत् । त्रयस्त्रिंशच्च । त्रयस्त्रिंशदिति
 त्रयः – त्रिंशत् । चैव । एवास्य । अस्य त्रीणि । त्रीणि च ।
 च शतानि । शतानि सा । साऽमुष्मिन् । अमुष्मिन् लोके ।
 लोके भवति । भवति वाक् । वागेव । एव सहस्रतमी । सहस्रतमी
 तस्मात् । सहस्रतमीति सहस्र – तमी । तस्माद् वरः । 24 (50/62)

TS 7.1.6.5 - Kramam

वरो देयः । देयः सा । सा हि । हि वरः । वरः सहस्रम् ।
 सहस्रमस्य । अस्य सा । सा दत्ता । दत्ता भवति । भवति तस्मात् ।
 तस्माद् वरः । वरो न । न प्रतिगृह्यः । प्रतिगृह्यः सा । प्रतिगृह्य इति
 प्रति – गृह्यः । सा हि । हि वरः । वरः सहस्रम् । सहस्रमस्य ।

अस्य॑ प्रति॑गृहीतम् । प्रति॑गृहीतम् भवति । प्रति॑गृहीतमिति
 प्रति॑ - गृही॒तम् । भव॒तीयम् । इयम्॑ वरः॑ । वर॑ इति॑ । इति॑ ब्रूयात् ।
 ब्रूया॑दथ । अथान्याम् । अन्याम् ब्रूयात् । ब्रूया॑दियम् । इयम्॑ मम॑ ।
 ममेति॑ । इति॑ तथा॑ । तथा॑ऽस्य । अस्य॑ तत् । तथ् सह॑स्रम् ।
 सह॑स्रमप्रति॑गृहीतम् । अप्रति॑गृहीतम् भवति ।
 अप्रति॑गृहीतमित्यप्रति॑ - गृही॒तम् । भवत्यु॑भयतएनी ।
 उ॒भयत॑एनी स्यात् । उ॒भयत॑एनीत्यु॒भयतः॑ - एनी । स्यात् तत् ।
 तदाहुः॑ । आ॒हु॒रन्य॑तएनी । अन्य॑तएनी स्यात् ।
 अन्य॑तएनीत्यन्यतः॑ - एनी । स्याथ् सह॑स्रम् । सह॑स्रम् पर॑स्तात् ।
 पर॑स्तादेतम् । एत॑मिति॑ । इति॑ या । यैव । ए॒व वरः॑ ।
 वरः॑ कल्याणी । 25 (50/55)

TS 7.1.6.6 - Kramam

क॒ल्या॒णी रू॒पस॑मृद्धा । रू॒पस॑मृद्धा सा । रू॒पस॑मृद्धेति॑
 रू॒प - स॑मृद्धा । सा स्यात् । स्याथ् सा । सा हि॑ । हि॑ वरः॑ ।
 वरः॑ स॑मृद्ध्यै । स॑मृद्ध्ये ताम् । स॑मृद्ध्या इति॑ सम् - ऋ॒द्ध्यै॑ ।
 तामु॑त्तरेण । उत्त॑रेणाग्नी॒द्ध्रम् । उत्त॑रेणेत्युत् - तरेण॑ ।

सप्तम काण्डे – प्रथमः प्रश्नः (TS 7.1)

आग्नी॑द्ध॒म् पर्या॑णीय॑ । आग्नी॑द्ध॒मित्याग्नि॑ – इद्ध॒म् ।
पर्या॑णीया॒हव॑नीयस्य॑ । पर्या॑णीयेति॑ परि-आनीय॑ । आह॑वनीयस्यान्ते॑ ।
आह॑वनीयस्येत्या॑ – ह॒वनीय॑स्य । अन्ते॑ द्रोणकलशम् ।
द्रोण॑कलशमव॑ । द्रोण॑कलशमिति॑ द्रोण – कलशम् । अव॑ घ्रापयेत् ।
घ्राप॑येदा । आ जिघ्र॑ । जिघ्र॑ कलशम् । कलशम्॑ महि । म॒ह्युरु॑धारा ।
उरु॑धारा पयस्वती । उरु॑धारेत्युरु – धारा । पयस्व॑त्या । आ त्वा॑ ।
त्वा वि॒शन्तु॑ । वि॒शन्ति॑न्दवः । इ॒न्दवः॑ स॒मुद्र॑म् । स॒मुद्र॑मिव ।
इ॒व सि॒न्धवः॑ । सि॒न्धवः॑ सा । सा मा॑ । मा सह॑स्र । सह॑स्र आ ।
आ भ॑ज । भ॒ज प्र॒जया॑ । प्र॒जया॑ प॒शुभिः॑ । प्र॒जयेति॑ प्र – जया॑ ।
प॒शुभिः॑ सह॑ । प॒शुभि॑रिति॑ प॒शु – भिः॑ । सह॑ पुनः॑ । पुन॑र् मा ।
मा । आ वि॒शता॑त् । वि॒शता॑द् रयिः॑ । रयि॑रिति॑ । इति॑ प्र॒जया॑ ।
प्र॒जयै॑व । प्र॒जयेति॑ प्र – जया॑ । ए॒वैन॑म् । ए॒नम् प॒शुभिः॑ ।
प॒शुभी॑ र॒य्या । प॒शुभि॑रिति॑ प॒शु – भिः॑ । र॒य्या स॑म् ।
स॒मर्द्ध॑यति । 26 (50/62)

TS 7.1.6.7 - Kramam

अ॒र्द्ध॒यति॑ प्र॒जा॒वान् । प्र॒जा॒वान् प॒शु॒मान् । प्र॒जा॒वा॒निति॑ प्र॒जा-वा॒न् ।
 प॒शु॒मान् र॒यि॒मान् । प॒शु॒मा॒निति॑ प॒शु - मा॒न् । र॒यि॒मान् भ॒वति॑ ।
 र॒यि॒मा॒निति॑ र॒यि - मा॒न् । भ॒वति॑ यः । य ए॒वम् । ए॒वम् वै॑द ।
 वे॒द तया॑ । तया॑ स॒ह । स॒हा॒ग्नी॒द्धम् । आ॒ग्नी॒द्धम् प॒रेत्य॑ ।
 आ॒ग्नी॒द्ध॒मि॒त्याग्नि॑ - इ॒द्धम् । प॒रेत्य॑ पु॒रस्ता॑त् । प॒रेत्येति॑
 प॒रा - इत्य॑ । पु॒रस्ता॑त् प्र॒ती॒च्याम् । प्र॒ती॒च्याम् तिष्ठ॑न्त्याम् ।
 तिष्ठ॑न्त्याम् ज॒हुया॑त् । जु॒हुया॑दु॒भा । उ॒भा जि॒ग्यथुः॑ । जि॒ग्यथु॑र् न ।
 न प॒रा । प॒रा ज॒येथे॑ । ज॒येथे॑ न । ज॒येथे॑ इति॑ ज॒येथे॑ । न प॒रा ।
 प॒रा जि॒ग्ये । जि॒ग्ये क॒तरः॑ । क॒तरश्च॑न । च॒नै॒नोः॑ । ए॒नो इत्ये॑नोः ॥
 इन्द्र॑श्च । च वि॒ष्णो । वि॒ष्णो यत् । वि॒ष्णो इति॑ वि॒ष्णो ।
 यद॑पस्पृ॒धे॒थाम् । अ॒पस्पृ॒धे॒थाम् त्रे॒धा । त्रे॒धा स॒हस्र॑म् । स॒हस्र॑म् वि॒ ।
 वि॒ तत् । तदै॑रये॒थाम् । ऐ॒रये॒थामिति॑ । इति॑ त्रे॒धावि॒भक्त॑म् ।
 त्रे॒धावि॒भक्त॑म् वै । त्रे॒धावि॒भक्त॑मिति॑ त्रे॒धा - वि॒भक्त॑म् । वै त्रि॒रात्रे॑ ।
 त्रि॒रात्रे॑ स॒हस्र॑म् । त्रि॒रात्र इति॑ त्रि - रा॒त्रे । स॒हस्र॑ सा॒हस्री॑म् ।
 सा॒हस्री॑मे॒व । ए॒वैना॑म् । ए॒नाम् क॒रोति॑ । क॒रोति॑ स॒हस्र॑स्य ।

स॒हस्र॑स्यै॒व । ए॒वैन॑नाम् । ए॒नाम् मा॒त्राम् () ।

मा॒त्राम् करो॑ति । 27 (50/59)

TS 7.1.6.8 - Kramam

करो॑ति रू॒पाणि॑ । रू॒पाणि॑ जु॒होति॑ । जु॒होति॑ रू॒पैः । रू॒पैरे॒व ।
 ए॒वैन॑नाम् । ए॒ना॒ञ् सम् । सम्॒र्द्धय॑ति । अ॒र्द्धय॑ति तस्याः॑ । तस्या॑
 उ॒पोत्था॑य । उ॒पोत्था॑य क॒र्णम् । उ॒पोत्था॑येत्यु॒प – उ॒त्था॑य । क॒र्णमा॑ ।
 आ ज॑पेत् । ज॑पेदि॒डे । इ॒डे र॒न्ते । र॒न्तेऽदि॑ते । अ॒दि॒ते सर॑स्वति ।
 सर॑स्वति प्रि॒ये । प्रि॒ये प्रे॑यसि । प्रे॑यसि म॒हि । म॒हि वि॒श्रुति॑ ।
 वि॒श्रुत्ये॑तानि । वि॒श्रुती॑ति वि – श्रु॒ति । ए॒तानि॑ ते । ते अ॒घ्निये॑ ।
 अ॒घ्निये॑ नामा॒नि । नामा॒नि सु॒कृत॑म् । सु॒कृत॑म् मा । सु॒कृत॑मि॒ति
 सु – कृत॑म् । मा दे॒वेषु॑ । दे॒वेषु॑ ब्रू॒तात् । ब्रू॒तादि॑ति । इति॑ दे॒वेभ्यः॑ ।
 दे॒वेभ्य॑ ए॒व । ए॒वैन॑म् । ए॒नमा॑ । आ वे॒दय॑ति । वे॒दय॑त्यनु॑ ।
 अ॒न्वेन॑म् । ए॒नम् दे॒वाः । दे॒वा बु॑द्ध्यन्ते ।

बु॒द्ध्यन्त॑ इति॑ बु॒द्ध्यन्ते॑ ॥ 28 (39/42)

(ए॒तदे॒तस्या॑म् वी॒र्यं॑ – म॒स्य त्रि॑भिश्च॑ – द॒त्ता – स॒हस्र॑तमी॒ तस्मा॑ –
 दे॒व वरः॑ – सम् – मा॒त्रा – मे॒कान्न॑ च॒त्वारि॑ञ्च॑) (A6)

TS 7.1.7.1 - Kramam

सहस्र॑त॒म्या॑ वै । सह॒स्र॒त॒म्येति॑ सह॒स्र - त॒म्या॑ ॥ वै यज॑मानः ।
यज॑मानः सु॒वर्ग॑म् । सु॒वर्ग॑म् लो॒कम् । सु॒वर्ग॑मिति॑ सुवः - गम् ।
लो॒कमेति॑ । ए॒ति सा । सैन॑म् । ए॒न॒ꣳ सु॒वर्ग॑म् । सु॒वर्ग॑म् लो॒कम् ।
सु॒वर्ग॑मिति॑ सुवः - गम् । लो॒कम् ग॒मय॑ति । ग॒मय॑ति सा । सा मा॑ ॥
मा सु॒वर्ग॑म् । सु॒वर्ग॑म् लो॒कम् । सु॒वर्ग॑मिति॑ सुवः - गम् । लो॒कम्
ग॒मय॑ । ग॒मयेति॑ । इत्या॑ह । आ॒ह सु॒वर्ग॑म् । सु॒वर्ग॑मे॒व । सु॒वर्ग॑मिति॑
सुवः - गम् । ए॒वैन॑म् । ए॒न॒ꣳ लो॒कम् । लो॒कम् ग॒मय॑ति ।
ग॒मय॑ति सा । सा मा॑ । मा ज्योति॑ष्मन्तम् । ज्योति॑ष्मन्तम् लो॒कम् ।
लो॒कम् ग॒मय॑ । ग॒मयेति॑ । इत्या॑ह । आ॒ह ज्योति॑ष्मन्तम् ।
ज्योति॑ष्मन्तमे॒व । ए॒वैन॑म् । ए॒न॒ꣳ लो॒कम् । लो॒कम् ग॒मय॑ति ।
ग॒मय॑ति सा । सा मा॑ । मा सर्वा॑न् । सर्वा॑न् पु॒ण्यान् । पु॒ण्यान्
लो॒कान् । लो॒काङ्ग॑मय । ग॒मयेति॑ । इत्या॑ह । आ॒ह सर्वा॑न् ।
सर्वा॑ने॒व । ए॒वैन॑म् । ए॒न॒ꣳ पु॒ण्यान् । पु॒ण्यान् लो॒कान् ।
लो॒काङ्ग॑मयति । ग॒मय॑ति सा । सा मा॑ ॥ 29 (50/55)

TS 7.1.7.2 - Kramam

मा॒ प्रति॒ष्ठाम् । प्रति॒ष्ठाम् ग॑मय । प्रति॒ष्ठामि॑ति॒ प्रति – स्था॑म् । ग॒मय॑
प्र॒जया॑ । प्र॒जया॑ प॒शुभिः॑ । प्र॒जये॑ति॒ प्र – जया॑ । प॒शुभिः॑ सह ।
प॒शुभि॑रिति॒ प॒शु-भिः॑ । सह पुनः॑ । पुन॑र् मा । मा । आ वि॒शता॑त् ।
वि॒शता॑द् रयिः॑ । रयि॑रिति॒ । इति॑ प्र॒जया॑ । प्र॒जयै॑व । प्र॒जये॑ति
प्र – जया॑ । ए॒वैन॑म् । ए॒नम् प॒शुभिः॑ । प॒शुभी॑ र॒य्याम् । प॒शुभि॑रिति॒
प॒शु – भिः॑ । र॒य्याम् प्रति॑ । प्रति॒ष्ठाप॑यति । स्था॒पय॑ति प्र॒जावा॑न् ।
प्र॒जावा॑न् प॒शुमा॑न् । प्र॒जावा॑निति॒ प्र॒जा – वा॑न् । प॒शुमा॑न् रयि॒मान् ।
प॒शुमा॑निति॒ प॒शु – मा॑न् । रयि॒मान् भ॑वति । रयि॒मानिति॑ रयि-मा॑न् ।
भ॒वति॒ यः । य ए॒वम् । ए॒वम् वे॑द । वे॒द ता॑म् । ता॒मग्नी॑धे ।
अ॒ग्नी॑धे वा । अ॒ग्नी॑ध इत्य॒ग्नि-इ॑धे । वा ब्र॒ह्म॑णे । ब्र॒ह्म॑णे वा ।
वा हो॒त्रे । हो॒त्रे वा । वो॒द्गा॒त्रे । उ॒द्गा॒त्रे वा । उ॒द्गा॒त्र इत्यु॑त् – गा॒त्रे ।
वाऽ॒ध्व॒र्यवे॑ । अ॒ध्व॒र्यवे॑ वा । वा द॒द्यात् । द॒द्यात् सह॑स्रम् ।
सह॑स्रमस्य । अ॒स्य सा॑ । सा द॒त्ता । द॒त्ता भ॑वति ।
भ॒वति॒ सह॑स्रम् । सह॑स्रमस्य । अ॒स्य प्रति॑गृहीतम् ।

प्रति॑गृही॒तम् भव॑ति । प्रति॑गृही॒तमि॒ति प्रति॑ – गृही॒तम् । भव॑ति यः ।
यस्त॑ाम् । ताम॑विद्वान् । अवि॑द्वान् प्रति॑गृह्णाति । 30 (50/61)

TS 7.1.7.3 - Kramam

प्रति॑गृह्णाति॒ ताम् । प्रति॑गृह्णा॒तीति॑ प्रति॑ – गृह्णाति॑ । ताम् प्रति॑ ।
प्रति॑ गृह्णी॒यात् । गृह्णी॒यादे॒का॑ । ए॒का॑ऽसि । अ॒सि न । न स॒हस्र॑म् ।
स॒हस्र॑मे॒का॑म् । ए॒का॑म् त्वा । त्वा भू॒ताम् । भू॒ताम् प्रति॑ । प्रति॑
गृह्णामि॑ । गृह्णामि॑ न । न स॒हस्र॑म् । स॒हस्र॑मे॒का॑ । ए॒का॑ मा ।
मा भू॒ता । भू॒ता । आ वि॒श । वि॒श मा । मा स॒हस्र॑म् ।
स॒हस्र॑मि॒ति । इत्ये॒का॑म् । ए॒का॑मे॒व । ए॒वैना॑म् । ए॒ना॑म् भू॒ताम् । भू॒ताम्
प्रति॑ । प्रति॑ गृह्णाति॑ । गृह्णाति॑ न । न स॒हस्र॑म् । स॒हस्र॑म् यः ।
य ए॒वम् । ए॒वम् वे॒द । वे॒द स्यो॒ना । स्यो॒नाऽसि॑ । अ॒सि सु॒षदा॑ ।
सु॒षदा सु॒शेवा॑ । सु॒षदेति॑ सु – सदा॑ । सु॒शेवा॑ स्यो॒ना । सु॒शेवेति॑
सु – शेवा॑ । स्यो॒ना मा॑ । मा । आ वि॒श । वि॒श सु॒षदा॑ ।
सु॒षदा मा॑ । सु॒षदेति॑ सु – सदा॑ । मा । आ वि॒श ।
वि॒श सु॒शेवा॑ । सु॒शेवा॑ मा । सु॒शेवेति॑ सु – शेवा॑ । मा ।
आ वि॒श । वि॒शेति॑ । 31 (50/55)

TS 7.1.7.4 - Kramam

इ॒त्याह॑ । आ॒ह स्यो॒ना । स्यो॒नैव॑ । ए॒वैन॑म् । ए॒नञ् सु॒षदा॑ ॥
सु॒षदा॑ सु॒शेवा॑ ॥ सु॒षदे॑ति सु – सदा॑ ॥ सु॒शेवा॑ भू॒ता । सु॒शेवे॑ति
सु – शेवा॑ ॥ भू॒ता । आ वि॒शति॑ । वि॒शति॑ न । नैन॑म् । ए॒नञ्
हि॒नस्ति॑ । हि॒नस्ति॑ ब्र॒ह्मवा॑दि॒नः । ब्र॒ह्मवा॑दि॒नो वद॑न्ति । ब्र॒ह्मवा॑दि॒न
इति॑ ब्र॒ह्म – वा॒दिनः॑ । वद॑न्ति स॒हस्र॑म् । स॒हस्रञ् स॒हस्र॑त॒मी ।
स॒हस्र॑त॒म्यनु॑ । स॒हस्र॑त॒मीति॑ स॒हस्र॑ – त॒मी । अ॒न्वेती॑(३) । ए॒ती(३)
स॒हस्र॑त॒मीम् । स॒हस्र॑त॒मीञ् स॒हस्रा॑(३)म् । स॒हस्र॑त॒मीमि॑ति
स॒हस्र॑ – त॒मीम् । स॒हस्रा॑(३)मि॑ति । इति॑ यत् । यत् प्रा॒चीम् ।
प्रा॒चीमु॑त्सृ॒जेत् । उ॒त्सृ॒जेत् स॒हस्र॑म् । उ॒त्सृ॒जेदित्यु॑त् – सृ॒जेत् ।
स॒हस्रञ् स॒हस्र॑त॒मी । स॒हस्र॑त॒म्यनु॑ । स॒हस्र॑त॒मीति॑ स॒हस्र॑ – त॒मी ।
अ॒न्वि॒यात् । इ॒यात् तत् । तथ् स॒हस्र॑म् । स॒हस्र॑मप्र॒ज्ञात्र॑म् ।
अ॒प्र॒ज्ञात्र॑ञ् सु॒वर्ग॑म् । अ॒प्र॒ज्ञात्र॑मित्यप्र॒ज्ञात्र॑म् । सु॒वर्ग॑म् लो॒कम् ।
सु॒वर्ग॑मि॒ति सु॒वः – ग॑म् । लो॒कम् न । न प्र । प्र जा॒नीया॑त् ।
जा॒नीया॑त् प्र॒तीची॑म् । प्र॒तीची॑मुत् । उ॒त् सृ॒जति॑ । सृ॒जति॑ ता॒म् ।
ताञ् स॒हस्र॑म् । स॒हस्र॑मनु॑ । अनु॑ पर्या॒वर्त॑ते । पर्या॒वर्त॑ते सा ।

तैत्तिरीय संहिता क्रम पाठे (TS 7.1)

पर्या॑वर्त॒त इति॑ परि – आव॑र्तते । सा प्र॑जान॒ती । प्र॒जान॒ती सु॒वर्ग॑म् ।
प्र॒जान॒तीति॑ प्र – जान॒ती । सु॒वर्ग॑म् लो॒कम् । सु॒वर्ग॑मि॒ति
सुवः॑-गम् । लो॒कमे॑ति । ए॒ति यज॑मानम् () । यज॑मानम॒भि ।
अ॒भ्युत् । उ॒थ् सृ॑जति । सृ॒जति॑ क्षि॒प्रे । क्षि॒प्रे स॒हस्र॑म् । स॒हस्र॑म् प्र ।
प्र जा॑यते । जा॒यत॑ उत्त॒मा । उत्त॒मा नी॑यते । उत्त॒मेत्यु॑त् – त॒मा ।
नी॑यते प्रथ॒मा । प्रथ॒मा दे॒वान् । दे॒वान् ग॑च्छति ।

ग॒च्छती॑ति ग॒च्छति॑ ॥ 32 (62/75)

(लो॒कान् ग॑मयति सा – अ॒वि॒द्वान्थ् – सु॒शे॒वा माऽऽवि॑श –
यज॑मानम् – द्वा॒दश॑ च) । (A7)

TS 7.1.8.1 - Kramam

अ॒त्रि॒रद॑दात् । अ॒ददा॑दौर्वा॒य । औ॒र्वा॒य प्र॒जाम् । प्र॒जाम् पु॒त्रका॑माय ।
प्र॒जामि॑ति प्र – जा॒म् । पु॒त्रका॑माय सः । पु॒त्रका॑मायेति॑
पु॒त्र-का॑माय । स रि॒रि॒चा॒नः । रि॒रि॒चा॒नोऽम॑न्यत । अ॒म॒न्य॒त निर्वी॑र्यः ।
निर्वी॑र्यः शि॒थि॒लः । निर्वी॑र्य इति॑ निः – वी॒र्यः । शि॒थि॒लो या॑तया॒मा ।
या॑तया॒मा सः । या॑तया॒मेति॑ या॒त – या॒मा । स ए॒तम् ।
ए॒तम् च॒तूरा॑त्रम् । च॒तूरा॑त्रमपश्यत् । च॒तूरा॑त्रमि॒ति चतुः॑ – रा॒त्रम् ।

अ॒प॒श्य॒त् तम् । त॒मा । आ॒ऽह॒र॒त् । अ॒ह॒र॒त् तेन॑ । तेना॑यजत ।
 अ॒य॒ज॒त ततः॑ । ततो॑ वै । वै तस्य॑ । तस्य॑ च॒त्वारः॑ । च॒त्वारो॑ वी॒राः ।
 वी॒रा आ । आ॒ऽजा॒य॒न्त । अ॒जा॒य॒न्त सु॒हो॒ता । सु॒हो॒ता सू॒द्गा॒ता ।
 सु॒हो॒तेति॑ सु – हो॒ता । सू॒द्गा॒ता स्व॒द्ध्व॒र्युः॑ । सू॒द्गा॒तेति॑
 सु – उ॒द्गा॒ता । स्व॒द्ध्व॒र्युः॑ सु॒स॒भेयः॑ । स्व॒द्ध्व॒र्यु॒रिति॑
 सु – अ॒द्ध्व॒र्युः॑ । सु॒स॒भेयो॑ यः । सु॒स॒भेय॑ इति॑ सु – स॒भेयः॑ ।
 य ए॒वम् । ए॒वम् वि॒द्वान् । वि॒द्वान् च॒तूरा॒त्रेण॑ । च॒तूरा॒त्रेण॑ यज॑ते ।
 च॒तूरा॒त्रेणेति॑ चतुः – रा॒त्रेण॑ । यज॑त आ । आ॒ऽस्य॑ । अ॒स्य च॒त्वारः॑ ।
 च॒त्वारो॑ वी॒राः । वी॒रा जा॒य॒न्ते । जा॒य॒न्ते सु॒हो॒ता । सु॒हो॒ता सू॒द्गा॒ता ।
 सु॒हो॒तेति॑ सु – हो॒ता । सू॒द्गा॒ता स्व॒द्ध्व॒र्युः॑ । सू॒द्गा॒तेति॑
 सु – उ॒द्गा॒ता । स्व॒द्ध्व॒र्युः॑ सु॒स॒भेयः॑ । स्व॒द्ध्व॒र्यु॒रिति॑
 सु – अ॒द्ध्व॒र्युः॑ । सु॒स॒भेयो॑ ये । सु॒स॒भेय॑ इति॑ सु – स॒भेयः॑ ।
 ये च॒तुर्विं॒शाः । च॒तुर्विं॒शाः प॒व॒मा॒नाः । च॒तुर्विं॒शा इति॑
 चतुः – विं॒शाः । प॒व॒मा॒ना ब्र॒ह्म॒व॒र्च॒सम् । ब्र॒ह्म॒व॒र्च॒सम् तत् ।
 ब्र॒ह्म॒व॒र्च॒समिति॑ ब्र॒ह्म – व॒र्च॒सम् । तद् ये । 33 (50/66)

TS 7.1.8.2 - Kramam

य उ॒द्यन्तः॑ । उ॒द्यन्तः॑ स्तो॒माः॑ । उ॒द्यन्त इत्यु॑त्-यन्तः॑ । स्तो॒माः॑ श्रीः॑ ।
 श्रीः॑ सा । साऽ॒त्रिम् । अ॒त्रिऽ॑ श्रद्धादे॒वम् । श्रद्धादे॒वम् य॑ज॒मानम् ।
 श्रद्धादे॒वमि॑ति श्रद्धा-दे॒वम् । यज॒मानम् च॒त्वारि॑ । च॒त्वारि॑ वी॒र्या॑णि ।
 वी॒र्या॑णि न । नो॒प । उ॒पान॑मन् । अ॒नमन् तेजः॑ । तेज इन्द्रि॒यम् ।
 इन्द्रि॒यम् ब्र॒ह्मव॑र्च॒सम् । ब्र॒ह्मव॑र्च॒सम॒न्नाद्य॑म् । ब्र॒ह्मव॑र्च॒समि॑ति
 ब्र॒ह्म - व॑र्च॒सम् । अ॒न्नाद्य॑ सः । अ॒न्नाद्य॑मित्य॒न्न - अ॒द्यम् ।
 स ए॒तान् । ए॒ताऽ॑श्चतु॒रः । च॒तुर॑श्चतु॒ष्टोमा॑न् । चतु॒ष्टोमा॑न् सो॒मान् ।
 चतु॒ष्टोमा॑निति चतुः - स्तो॒मान् । स्तो॒मान॑पश्यत् । अ॒पश्य॑त् तान् ।
 ताना॑ । आऽ॒हरत् । अ॒हरत् तैः॑ । तैर॑यजत । अ॒यज॑त तेजः॑ ।
 तेज ए॒व । ए॒व प्र॑थ॒मेन॑ । प्र॒थमे॑नाव । अ॒वारु॑न्ध । अ॒रुन्ध इन्द्रि॒यम् ।
 इन्द्रि॒यम् द्वि॒तीये॑न । द्वि॒तीये॑न ब्र॒ह्मव॑र्च॒सम् । ब्र॒ह्मव॑र्च॒सम् तृ॒तीये॑न ।
 ब्र॒ह्मव॑र्च॒समि॑ति ब्र॒ह्म - व॑र्च॒सम् । तृ॒तीये॑ना॒न्नाद्य॑म् । अ॒न्नाद्य॑म्
 चतु॒र्थेन॑ । अ॒न्नाद्य॑मित्य॒न्न - अ॒द्यम् । चतु॒र्थेन॑ यः । य ए॒वम् ।
 ए॒वम् वि॒द्वान् । वि॒द्वाऽ॑श्चतु॒रः । च॒तुर॑श्चतु॒ष्टोमा॑न् । चतु॒ष्टोमा॑न् स्तो॒मान् ।
 चतु॒ष्टोमा॑निति चतुः - स्तो॒मान् । सो॒माना॑हरति । आ॒हर॑ति तैः॑ ।

आ॒हर॒ती॒त्या॑ – हर॑ति । तैर् यज॑ते । यज॑ते तेजः॑ । तेज॑ ए॒व () ।
 ए॒व प्र॒थ॒मे॒न । प्र॒थ॒मे॒ना॒व । अ॒व रु॒न्धे । रु॒न्ध इ॒न्द्रि॒यम् ।
 इ॒न्द्रि॒यम् द्वि॒तीये॑न । द्वि॒तीये॑न ब्र॒ह्मव॑र्च॒सम् । ब्र॒ह्मव॑र्च॒सम् तृ॒तीये॑न ।
 ब्र॒ह्मव॑र्च॒समि॒ति ब्र॒ह्म – व॑र्च॒सम् । तृ॒तीये॑ना॒न्नाद्य॑म् । अ॒न्नाद्य॑म्
 चतु॑र्थे॒न । अ॒न्नाद्य॑मित्य॒न्न – अ॒द्यम् । चतु॑र्थे॒न या॑म् । या॒मे॒व ।
 ए॒वा॒त्रिः । अ॒त्रिर् ऋ॒द्धिम् । ऋ॒द्धिमा॑द्ध्यो॒त् । आ॑द्ध्यो॒त् ता॑म् ।
 ता॒मे॒व । ए॒व यज॑मानः । यज॑मान ऋ॒द्ध्यो॒ति ।

ऋ॒द्ध्यो॒तीत्यृ॑द्ध्यो॒ति ॥ 34 (68/79)

(तत् – तेज॑ ए॒वा – द्वा॑द॒श च) (A8)

TS 7.1.9.1 - Kramam

ज॒मद॑ग्निः पु॒ष्टिका॑मः । पु॒ष्टिका॑मश्चतू॒रात्रे॑ण । पु॒ष्टिका॑म इति॑
 पु॒ष्टि – का॑मः । चतू॒रात्रे॑णायजत । चतू॒रात्रे॑णेति॑ चतुः – रा॒त्रेण॑ ।
 अ॒यज॑त सः । स ए॒तान् । ए॒तान् पो॑षान् । पो॒षा अ॑पु॒ष्यत् ।
 अ॒पु॒ष्यत् तस्मा॑त् । तस्मा॑त् प॒लितौ॑ । प॒लितौ॑ जा॒मद॑ग्नियौ ।
 जा॒मद॑ग्नियौ न । न स॒म् । स॒म् जा॑नाते । जा॒नाते॑ ए॒तान् ।
 जा॒नाते॑ इति॑ जा॒नाते॑ । ए॒ताने॑व । ए॒व पो॑षान् । पो॒षान् पु॑ष्यति ।

पु॒ष्यति॑ यः । य ए॒वम् । ए॒वम् वि॒द्वान् । वि॒द्वान्॑श्चतू॒रात्रे॑ण । चतू॒रात्रे॑ण
यज॑ते । चतू॒रात्रे॑णेति॑ चतुः – रात्रे॑ण । यज॑ते पु॒रोडा॑शिन्यः ।
पु॒रोडा॑शिन्य॑ उप॒सदः॑ । उप॒सदो॑ भव॑न्ति । उप॒सद॑ इत्युप – सदः॑ ।
भव॑न्ति प॒शवः॑ । प॒शवो॑ वै । वै पु॒रोडा॑शः । पु॒रोडा॑शः प॒शून् ।
प॒शूने॒व । ए॒वाव॑ । अ॒व रु॒न्धे । रु॒न्धेऽन्न॑म् । अ॒न्नम् वै ।
वै पु॒रोडा॑शः । पु॒रोडा॑शोऽन्न॑म् । अ॒न्नमे॒व । ए॒वाव॑ । अ॒व रु॒न्धे ।
रु॒न्धेऽन्ना॑दः । अ॒न्नादः॑ प॒शुमान् । अ॒न्नाद॑ इत्यन्न – अ॒दः ।
प॒शुमान्॑ भव॑ति । प॒शुमानि॑ति प॒शु – मान् । भव॑ति यः । य ए॒वम् ।
ए॒वम् वि॒द्वान् । वि॒द्वान्॑श्चतू॒रात्रे॑ण । चतू॒रात्रे॑ण यज॑ते ।
चतू॒रात्रे॑णेति॑ चतुः – रात्रे॑ण । यज॑त इति॑ यज॑ते ॥ 35 (48/56)

(जमदग्नि – रष्टाचत्वारिंशत्) (A9)

TS 7.1.10.1 - Kramam

स॒म्व॑त्सरो॒ वै । स॒म्व॑त्स॒र इति॑ स॒म्व॑त्स॒रः । वा इ॒दम् ।
इ॒दमे॒कः । ए॒क आ॑सीत् । आ॒सी॒त् सः । सोऽ॒काम॑यत ।
अ॒काम॑यत॒तून् । ऋ॒तून् सृ॑जेय । सृ॒जे॒येति॑ । इति॑ सः । स ए॒तम् ।
ए॒तम् पञ्च॑रात्रम् । पञ्च॑रात्रम॒पश्य॑त् । पञ्च॑रात्रमि॒ति पञ्च॑-रात्रम् ।

सप्तम काण्डे – प्रथमः प्रश्नः (TS 7.1)

अ॒प॒श्य॒त् त॒म् । त॒मा । आ॒ऽह॒र॒त् । अ॒ह॒र॒त् ते॒न । ते॒ना॒य॒ज॒त । अ॒य॒ज॒त
त॒तः । त॒तो वै । वै सः । स ऋ॒तून् । ऋ॒तून्सृ॒ज॒त । अ॒सृ॒ज॒त यः ।
य ए॒वम् । ए॒वम् वि॒द्वान् । वि॒द्वान् पञ्च॒रा॒त्रेण॑ । पञ्च॒रा॒त्रेण॑ य॒ज॒ते ।
पञ्च॒रा॒त्रेणे॒ति पञ्च॑ – रा॒त्रेण॑ । य॒ज॒ते प्र॒ । प्रै॒व । ए॒व जा॒य॒ते ।
जा॒य॒ते ते॒ । त ऋ॒तवः॑ । ऋ॒तवः॑ सृ॒ष्टाः । सृ॒ष्टा न॒ । न व्या॒व॒र्त॒न्त ।
व्या॒व॒र्त॒न्त ते॒ । व्या॒व॒र्त॒न्ते॒ति वि॑ – आ॒व॒र्त॒न्त । त ए॒तम् । ए॒तम्
पञ्च॒रा॒त्रम् । पञ्च॒रा॒त्रम॑प॒श्य॒न् । पञ्च॒रा॒त्रमि॒ति पञ्च॑ – रा॒त्रम् ।
अ॒प॒श्य॒न् त॒म् । त॒मा । आ॒ऽह॒र॒न् । अ॒ह॒र॒न् ते॒न । ते॒ना॒ऽय॒ज॒न्त ।
अ॒य॒ज॒न्त त॒तः । त॒तो वै । वै ते॒ । ते व्या॒व॒र्त॒न्त । व्या॒व॒र्त॒न्त यः ।
व्या॒व॒र्त॒न्ते॒ति वि॑ – आ॒व॒र्त॒न्त । 36 (50/56)

TS 7.1.10.2 - Kramam

य ए॒वम् । ए॒वम् वि॒द्वान् । वि॒द्वान् पञ्च॒रा॒त्रेण॑ । पञ्च॒रा॒त्रेण॑ य॒ज॒ते ।
पञ्च॒रा॒त्रेणे॒ति पञ्च॑ – रा॒त्रेण॑ । य॒ज॒ते वि॒ । वि पा॒प्म॒ना ।
पा॒प्म॒ना भ्रा॒तृ॒व्येण॑ । भ्रा॒तृ॒व्ये॒णा । आ॒ व॒र्त॒ते । व॒र्त॒ते सा॒र्व॒से॒निः ।
सा॒र्व॒से॒निः शौ॒चे॒यः । सा॒र्व॒से॒निरि॒ति सा॒र्व॑ – से॒निः ।

शौ॒चे॒योऽ॒काम॑यत । अ॒काम॑यत प॒शु॒मान् । प॒शु॒मान्थ् स्या॑म् ।
 प॒शु॒मानि॑ति प॒शु - मान् । स्या॑मि॒ति । इति॑ सः । स ए॒तम् । ए॒तम्
 प॒ञ्च॒रा॒त्रम् । प॒ञ्च॒रा॒त्रमा॑ । प॒ञ्च॒रा॒त्रमि॑ति प॒ञ्च - रा॒त्रम् । आ॒ह॒रत् ।
 अ॒ह॒रत् ते॑न । ते॒नाय॑जत । अ॒य॒ज॒त त॑तः । ततो॑ वै । वै सः ।
 स स॒ह॒स्रम् । स॒ह॒स्रम् प॒शून् । प॒शून् प्र॑ । प्रा॒प्नो॑त् । आ॒प्नो॑द् यः ।
 य ए॒वम् । ए॒वम् वि॒द्वान् । वि॒द्वान् प॒ञ्च॒रा॒त्रेण॑ । प॒ञ्च॒रा॒त्रेण॑ य॒ज॒ते ।
 प॒ञ्च॒रा॒त्रेणे॑ति प॒ञ्च - रा॒त्रेण॑ । य॒ज॒ते प्र॑ । प्र स॒ह॒स्रम् । स॒ह॒स्रम्
 प॒शून् । प॒शूना॑प्नोति । आ॒प्नो॑ति ब॒बरः । ब॒बरः प्रा॑वा॒ह॒णिः ।
 प्रा॑वा॒ह॒णिर॑कामयत । अ॒काम॑यत वा॒चः । वा॒चः प्र॑व॒दिता॑ । प्र॒व॒दिता॑
 स्या॑म् । प्र॒व॒दि॒तेति॑ प्र - व॒दिता॑ । स्या॑मि॒ति । इति॑ सः । स ए॒तम् ।
 ए॒तम् प॒ञ्च॒रा॒त्रम् । प॒ञ्च॒रा॒त्रमा॑ । प॒ञ्च॒रा॒त्रमि॑ति प॒ञ्च - रा॒त्रम् ।
 आ॒ह॒रत् । 37 (50/57)

TS 7.1.10.3 - Kramam

अ॒ह॒रत् ते॑न । ते॒नाय॑जत । अ॒य॒ज॒त त॑तः । ततो॑ वै । वै सः ।
 स वा॒चः । वा॒चः प्र॑व॒दिता॑ । प्र॒व॒दिता॑ऽभ॒वत् । प्र॒व॒दि॒तेति॑ प्र - व॒दिता॑ ।
 अ॒भ॒वद् यः । य ए॒वम् । ए॒वम् वि॒द्वान् । वि॒द्वान् प॒ञ्च॒रा॒त्रेण॑ ।

सप्तम काण्डे – प्रथमः प्रश्नः (TS 7.1)

पञ्चरात्रेण यजते । पञ्चरात्रेणेति पञ्च – रात्रेण । यजते प्रवदिता ।
प्रवदितैव । प्रवदितेति प्र – वदिता । एव वाचः । वाचो भवति ।
भवत्यथौ । अथो एनम् । अथो इत्यथौ । एनम् वाचः ।
वाचस्पतिः । पतिरिति । इत्याहुः । आहुरनाप्तः । अनाप्तश्चतूरात्रः ।
चतूरात्रोऽतिरिक्तः । चतूरात्र इति चतुः – रात्रः । अतिरिक्तषड्रात्रः ।
अतिरिक्त इत्यति – रिक्तः । षड्रात्रोऽथ । षड्रात्र इति षट् – रात्रः ।
अथ वै । वा एषः । एष सम्प्रति । सम्प्रति यज्ञः । सम्प्रतीति
सम् – प्रति । यज्ञो यत् । यत् पञ्चरात्रः । पञ्चरात्रो यः । पञ्चरात्र
इति पञ्च – रात्रः । य एवम् । एवम् विद्वान् । विद्वान् पञ्चरात्रेण ।
पञ्चरात्रेण यजते । पञ्चरात्रेणेति पञ्च – रात्रेण । यजते सम्प्रति ।
सम्प्रत्येव । सम्प्रतीति सम् – प्रति । एव यज्ञेन । यज्ञेन यजते ।
यजते पञ्चरात्रः । पञ्चरात्रो भवति । पञ्चरात्र इति पञ्च – रात्रः ।
भवति पञ्च । पञ्च वै । वा ऋतवः । ऋतवः सम्वत्सरः ।
सम्वत्सर ऋतुषु । सम्वत्सर इति सम् – वत्सरः । 38 (50/63)

TS 7.1.10.4 - Kramam

ऋ॒तु॒ष्वे॒व । ए॒व स॒म्व॑त्स॒रे । स॒म्व॑त्स॒रे प्र॒ति । स॒म्व॑त्स॒र इति॑
 स॒म्व॑त्स॒रे । प्र॒ति ति॑ष्ठति । ति॒ष्ठत्य॑थो॒ । अथो॑ पञ्चाक्ष॒रा ।
 अथो॑ इत्य॒थो॒ । पञ्चाक्ष॒रा प॒ङ्क्तिः॑ । पञ्चाक्ष॒रेति॑ पञ्च॒-अक्ष॒रा ।
 प॒ङ्क्तिः॑ पा॒ङ्क्तः॑ । पा॒ङ्क्तो॑ य॒ज्ञः । य॒ज्ञो य॒ज्ञम् । य॒ज्ञमे॒व । ए॒वाव॑ ।
 अ॒व रु॒न्धे । रु॒न्धे त्रि॒वृत् । त्रि॒वृद॑ग्नि॒ष्टोमः॑ । त्रि॒वृदि॑ति त्रि॒ - वृत् ।
 अ॒ग्नि॒ष्टोमो॑ भ॒वति॑ । अ॒ग्नि॒ष्टोम॑ इत्य॒ग्नि - स्तो॒मः । भ॒वति॑ तेजः॑ ।
 तेज॑ ए॒व । ए॒वाव॑ । अ॒व रु॒न्धे । रु॒न्धे पञ्च॑द॒शः । पञ्च॑द॒शो
 भ॒वति॑ । पञ्च॑द॒श इति॑ पञ्च॒ - द॒शः । भ॒वती॑न्द्रि॒यम् । इन्द्रि॒यमे॒व ।
 ए॒वाव॑ । अ॒व रु॒न्धे । रु॒न्धे स॒प्तद॑शः । स॒प्तद॑शो भ॒वति॑ । स॒प्तद॑श
 इति॑ स॒प्त - द॑शः । भ॒वत्य॑न्नाद्य॒स्य । अ॒न्नाद्य॑स्या॒वरु॑द्ध्यै ।
 अ॒न्नाद्य॑स्येत्य॒न्न - अ॒द्यस्य॑ । अ॒वरु॑द्ध्य॒ अथो॑ । अ॒वरु॑द्ध्य॒
 इत्य॑व॒ - रु॒द्ध्यै॑ । अथो॑ प्र॒ । अथो॑ इत्य॒थो॒ । प्रै॒व । ए॒व तेन॑ ।
 तेन॑ जा॒यते॑ । जा॒यते॑ पञ्च॒वि॒ंशः॑ । पञ्च॒वि॒ंशो॑ऽग्नि॒ष्टोमः॑ ।
 पञ्च॒वि॒ंश इति॑ पञ्च॒ - वि॒ंशः॑ । अ॒ग्नि॒ष्टोमो॑ भ॒वति॑ ।
 अ॒ग्नि॒ष्टोम॑ इत्य॒ग्नि - स्तो॒मः । भ॒वति॑ प्र॒जाप॑तेः । प्र॒जाप॑तेरा॒प्त्यै॑ ।

सप्तम काण्डे – प्रथमः प्रश्नः (TS 7.1)

प्र॒जा॒प॒ते॒रि॒ति॒ प्र॒जा – प॒तेः । आ॒प्त्यै॑ म॒हा॒व्र॒त॒वा॒न् ।
म॒हा॒व्र॒त॒वा॒न॒न्ना॒द्य॒स्य॑ । म॒हा॒व्र॒त॒वा॒नि॒ति॒ म॒हा॒व्र॒त – वा॒न् ।
अ॒न्ना॒द्य॒स्या॒व॒रु॒द्ध्यै॑ । अ॒न्ना॒द्य॒स्ये॒त्य॒न्न – अ॒द्य॒स्य॑ । अ॒व॒रु॒द्ध्यै॑
वि॒श्व॒जि॒त् । अ॒व॒रु॒द्ध्य॒ इ॒त्य॒व – रु॒द्ध्यै॑ । वि॒श्व॒जि॒त् स॒र्व॒पृ॒ष्ठः ।
वि॒श्व॒जि॒दि॒ति॒ वि॒श्व – जि॒त् । स॒र्व॒पृ॒ष्ठोऽति॒रा॒त्रः । स॒र्व॒पृ॒ष्ठ इ॒ति॒
स॒र्व – पृ॒ष्ठः । अ॒ति॒रा॒त्रो भ॑वति । अ॒ति॒रा॒त्र इ॒त्य॒ति – रा॒त्रः ।
भ॑वति स॒र्व॒स्य॑ । स॒र्व॒स्या॒भि॒जि॒त्यै () ।

अ॒भि॒जि॒त्या इ॒त्य॒भि – जि॒त्यै ॥ 39 (50/69)

(ते॒ व्या॒वर्त॑न्त – प्र॒व॒दि॒ता स्या॒मि॒ति॒ स ए॒तम् प॑ञ्च॒रा॒त्र॒मा –
स॒व॒त्स॒रौ – भि॒जि॒त्यै) (A10)

TS 7.1.11.1 - Kramam

दे॒व॒स्य॑ त्वा । त्वा स॒वि॒तुः । स॒वि॒तुः प्र॒स॒वे । प्र॒स॒वेऽश्वि॑नोः ॥
प्र॒स॒व इ॒ति॒ प्र – स॒वे । अ॒श्वि॑नोर् बा॒हु॒भ्याम् ॥ बा॒हु॒भ्याम् पू॒ष्णः॑ ॥
बा॒हु॒भ्या॒मि॒ति॒ बा॒हु – भ्याम् ॥ पू॒ष्णो ह॒स्ता॒भ्याम् ॥ ह॒स्ता॒भ्या॒मा ॥
आ द॒दे । द॒द इ॒मा॒म् । इ॒मा॒म॒गृ॒भ्ण॒न् । अ॒गृ॒भ्ण॒न् र॒श॒ना॒म् ।
र॒श॒ना॒मृ॒त॒स्य॑ । ऋ॒त॒स्य॑ पू॒र्वे ॥ पू॒र्वे आ॒यु॒षि॑ । आ॒यु॒षि वि॒द॒थे॒षु ।

वि॒द॒थेषु॑ क॒व्या । क॒व्येति॑ क॒व्या ॥ तया॑ दे॒वाः । दे॒वाः सु॒तम् ।
सु॒तमा॑ । आ ब॒भूवुः॑ । ब॒भूवुर्॑ ऋ॒तस्य॑ । ऋ॒तस्य॑ सा॒मन्त् ॥ सा॒मन्त्
स॒रम् । स॒रमा॑र॒पन्ती॑ । आ॒र॒पन्ती॑त्या॒ – र॒पन्ती॑ ॥ अ॒भि॒धा अ॑सि ।
अ॒भि॒धा इ॒त्यभि॑ – धाः । अ॒सि भु॑वनम् । भु॒वन॑म॒सि । अ॒सि य॒न्ता ।
य॒न्ताऽसि॑ ॥ अ॒सि ध॑र्ता । ध॒र्ताऽसि॑ । अ॒सि सः॑ । सोऽग्नि॑म् ।
अ॒ग्निम् वै॑श्वा॒नर॑म् । वै॒श्वा॒नर॑ स॒प्रथ॑सम् । स॒प्रथ॑सम् ग॒च्छ ।
स॒प्रथ॑स॒मिति॑ स – प्र॒थस॑म् । ग॒च्छ स्वा॑हाकृतः । स्वा॑हाकृतः
पृ॒थि॒व्याम् । स्वा॑हाकृत इति॒ स्वाहा॑ – कृतः । पृ॒थि॒व्याम् य॒न्ता ।
य॒न्ता राट् । राट् य॒न्ता । य॒न्ताऽसि॑ । अ॒सि य॑मनः । य॑मनो ध॒र्ता ।
ध॒र्ताऽसि॑ । अ॒सि ध॑रुणः () । ध॒रुणः॑ कृ॒ष्यै । कृ॒ष्यै त्वा॑ । त्वा
क्षे॒माय॑ । क्षे॒माय॑ त्वा । त्वा र॒य्यै । र॒य्यै त्वा॑ । त्वा पो॒षाय॑ । पो॒षाय॑
त्वा । त्वा पृ॒थि॒व्यै । पृ॒थि॒व्यै त्वा॑ । त्वाऽन्त॑रि॒क्षाय॑ । अ॒न्त॑रि॒क्षाय॑ त्वा ।
त्वा दि॒वे । दि॒वे त्वा॑ । त्वा स॒ते । स॒ते त्वा॑ । त्वाऽस॑ते । अ॒स॑ते त्वा ।
त्वाऽद्भ्यः॑ । अ॒द्भ्यस्त्वा॑ । अ॒द्भ्य इ॒त्यत् – भ्यः॑ । त्वौष॑धी॒भ्यः ।

सप्तम काण्डे – प्रथमः प्रश्नः (TS 7.1)

ओष॑धी॒भ्यस्त्वा । ओष॑धी॒भ्य इ॒त्योष॑धि – भ्यः । त्वा विश्वे॑भ्यः ।
विश्वे॑भ्यस्त्वा । त्वा भू॒तेभ्यः॑ । भू॒तेभ्य इति॑ भू॒तेभ्यः॑ ॥ 40 (75/82)

(धरुणः – पञ्चविंशतिश्च) (A11)

TS 7.1.12.1 - Kramam

वि॒भूर् मा॒त्रा । वि॒भूरि॑ति वि – भूः । मा॒त्रा प्र॒भूः । प्र॒भूः पि॒त्रा ।
प्र॒भूरि॑ति प्र – भूः । पि॒त्राऽश्वः॑ । अश्वो॑ऽसि । अ॒सि ह॒यः । ह॒योऽसि॑ ।
अ॒स्यत्यः॑ । अ॒त्योऽसि॑ । अ॒सि न॒रः । न॒रोऽसि॑ । अ॒स्यर्वा॑ ।
अ॒र्वाऽसि॑ । अ॒सि स॒प्तिः । स॒प्तिर॑सि । अ॒सि वा॒जी । वा॒ज्यसि॑ ।
अ॒सि वृषा॑ । वृषा॑ऽसि । अ॒सि नृ॒मणाः॑ । नृ॒मणा॑ अ॒सि । नृ॒मणा॑ इति॑
नृ – म॒नाः । अ॒सि य॒युः । य॒युर् ना॒म । ना॒मासि॑ । अ॒स्यादि॒त्याना॑म् ।
आ॒दि॒त्याना॑म् प॒त्व । प॒त्वानु॑ । अ॒न्विहि॑ । इ॒ह्यग्नये॑ । अ॒ग्नये॑ स्वाहा॑ ।
स्वाहा॑ स्वाहा॑ । स्वाहे॑न्द्रा॒ग्निभ्या॑म् । इन्द्रा॒ग्निभ्या॑ स्वाहा॑ ।
इन्द्रा॒ग्निभ्या॑मितीन्द्रा॒ग्नि – भ्या॑म् । स्वाहा॑ प्र॒जाप॑तये । प्र॒जाप॑तये
स्वाहा॑ । प्र॒जाप॑तय इति॑ प्र॒जा – प॑तये । स्वाहा॑ विश्वे॑भ्यः । विश्वे॑भ्यो
दे॒वेभ्यः॑ । दे॒वेभ्यः॑ स्वाहा॑ । स्वाहा॑ सर्वा॑भ्यः । सर्वा॑भ्यो दे॒वता॑भ्यः ।
दे॒वता॑भ्य इ॒ह । इ॒ह धृ॑तिः । धृ॑तिः स्वाहा॑ । स्वाहे॑ह । इ॒ह वि॑धृतिः ।

वि॒धृ॒तिः॑ स्वा॒हा॑ । वि॒धृ॒तिरि॒ति वि॒ - धृ॒तिः॑ । स्वा॒हे॒ह॑ । इ॒ह र॒न्तिः॑ ।
रन्तिः॑ स्वा॒हा॑ () । स्वा॒हे॒ह॑ । इ॒ह र॒मतिः॑ । र॒मतिः॑ स्वा॒हा॑ । स्वा॒हा॑
भूः॑ । भू॒रसि॑ । अ॒सि भु॒वे । भु॒वे त्वा॑ । त्वा॑ भ॒व्याय॑ । भ॒व्याय॑ त्वा॑ ।
त्वा॑ भ॒विष्य॑ते । भ॒विष्य॑ते त्वा॑ । त्वा॑ वि॒श्वेभ्यः॑ । वि॒श्वेभ्य॑स्त्वा॑ । त्वा॑
भू॒तेभ्यः॑ । भू॒तेभ्यो॑ दे॒वाः । दे॒वा आ॒शापा॒लाः । आ॒शापा॒ला ए॒तम् ।
आ॒शापा॒ला इ॒त्याशा॑ - पा॒लाः । ए॒तम् दे॒वेभ्यः॑ । दे॒वेभ्यो॑ऽश्व॑म् ।
अश्व॑म् मे॒धाय॑ । मे॒धाय॑ प्रो॒क्षित॑म् । प्रो॒क्षित॑म् गो॒पाय॑त ।

प्रो॒क्षित॑मि॒ति प्र॒ - उ॒क्षित॑म् । गो॒पाय॑तेति गो॒पाय॑त ॥ 41 (72/80)

(रन्तिः स्वाहा - द्वाविंशतिश्च) (A12)

TS 7.1.13.1 - Kramam

आ॒यना॑य स्वा॒हा॑ । आ॒यना॑येत्या॑ - अ॒यना॑य । स्वा॒हा प्रा॒यणा॑य ।
प्रा॒यणा॑य स्वा॒हा॑ । प्रा॒यणा॑येति॑ प्र॒ - अ॒यना॑य । स्वा॒होद्द्रा॑वाय ।
उ॒द्द्रा॑वाय स्वा॒हाः॑ । उ॒द्द्रा॑वायेत्यु॑त् - द्रा॒वाय॑ । स्वा॒होद्द्रु॑ताय ।
उ॒द्द्रु॑ताय स्वा॒हा॑ । उ॒द्द्रु॑तायेत्यु॑त् - द्रु॒ताय॑ । स्वा॒हा शू॒का॒राय॑ ।
शू॒का॒राय॑ स्वा॒हा॑ । शू॒का॒रायेति॑ शू॒ - का॒राय॑ । स्वा॒हा शू॒कृ॒ताय॑ ।
शू॒कृ॒ताय॑ स्वा॒हा॑ । शू॒कृ॒तायेति॑ शू॒ - कृ॒ताय॑ । स्वा॒हा प॒ला॒यिता॑य ।

सप्तम काण्डे – प्रथमः प्रश्नः (TS 7.1)

प॒ला॒यि॒ताय॑ स्वा॒हा । स्वा॒हाऽप॒ला॒यि॒ताय॑ । आ॒प॒ला॒यि॒ताय॑ स्वा॒हा ।
आ॒प॒ला॒यि॒ताये॒त्या-प॒ला॒यि॒ताय॑ । स्वा॒हाऽव॒ल्गा॒ते । आ॒व॒ल्गा॒ते स्वा॒हा ।
आ॒व॒ल्गा॒त इ॒त्या – व॒ल्गा॒ते । स्वा॒हा प॒राव॒ल्गा॒ते । प॒राव॒ल्गा॒ते स्वा॒हा ।
प॒राव॒ल्गा॒त इ॒ति प॒रा – व॒ल्गा॒ते । स्वा॒हाऽय॒ते । आ॒य॒ते स्वा॒हा ।
आ॒य॒त इ॒त्या – य॒ते । स्वा॒हा प्र॒य॒ते । प्र॒य॒ते स्वा॒हा ।
प्र॒य॒त इ॒ति प्र – य॒ते । स्वा॒हा स॒र्वस्मै॑ । स॒र्वस्मै॑ स्वा॒हा ।
स्वा॒हेति॑ स्वा॒हा ॥ 42 (26/37)

(आ॒य॒ना॒यो॒त्तर॑मा॒प॒ला॒यि॒ताय॑ षड्विंश॒तिः) (A13)

TS 7.1.14.1 - Kramam

अ॒ग्नये॑ स्वा॒हा । स्वा॒हा सो॒माय॑ । सो॒माय॑ स्वा॒हा । स्वा॒हा वा॒यवे॑ ।
वा॒यवे॑ स्वा॒हा । स्वा॒हाऽपाम् । अ॒पाम् मो॒दाय॑ । मो॒दाय॑ स्वा॒हा ।
स्वा॒हा स॒वि॒त्रे । स॒वि॒त्रे स्वा॒हा । स्वा॒हा स॒रस्व॑त्यै । स॒रस्व॑त्यै स्वा॒हा ।
स्वा॒हेन्द्रा॑य । इन्द्रा॑य स्वा॒हा । स्वा॒हा बृ॒हस्प॑तये । बृ॒हस्प॑तये स्वा॒हा ।
स्वा॒हा मि॒त्राय॑ । मि॒त्राय॑ स्वा॒हा । स्वा॒हा व॒रु॒णाय॑ । व॒रु॒णाय॑ स्वा॒हा ।
स्वा॒हा स॒र्वस्मै॑ । स॒र्वस्मै॑ स्वा॒हा ॥ स्वा॒हेति॑ स्वा॒हा ॥ 43 (23/23)

(अ॒ग्नये॑ वा॒यवे॑ ऽपाम् मो॒दायेन्द्रा॑य त्रयोविंश॒तिः) (A14)

TS 7.1.15.1 - Kramam

पृ॒थि॒व्यै॑ स्वा॒हा॑ । स्वा॒हा॑ऽन्तरि॒क्षाय॑ । अन्तरि॒क्षाय॑ स्वा॒हा॑ ।
 स्वा॒हा॑ दि॒वे । दि॒वे स्वा॒हा॑ । स्वा॒हा॑ सू॒र्या॒य । सू॒र्या॒य स्वा॒हा॑ । स्वा॒हा॑
 च॒न्द्र॒म॒से॑ । च॒न्द्र॒म॒से॑ स्वा॒हा॑ । स्वा॒हा॑ नक्ष॒त्रेभ्यः॑ । नक्ष॒त्रेभ्यः॑ स्वा॒हा॑ ।
 स्वा॒हा॑ प्रा॒च्यै॑ । प्रा॒च्यै॑ दि॒शे । दि॒शे स्वा॒हा॑ । स्वा॒हा॑ दक्षि॒णायै॑ ।
 दक्षि॒णायै॑ दि॒शे । दि॒शे स्वा॒हा॑ । स्वा॒हा॑ प्र॒ती॒च्यै॑ । प्र॒ती॒च्यै॑ दि॒शे ।
 दि॒शे स्वा॒हा॑ । स्वा॒हो॒दी॒च्यै॑ । उ॒दी॒च्यै॑ दि॒शे । दि॒शे स्वा॒हा॑ ।
 स्वा॒हो॒र्ध्वा॒यै॑ । ऊ॒र्ध्वा॒यै॑ दि॒शे । दि॒शे स्वा॒हा॑ । स्वा॒हा॑ दिग्भ्यः॑ ।
 दिग्भ्यः॑ स्वा॒हा॑ । दिग्भ्य॑ इति दिक् - भ्यः॑ । स्वा॒हा॑ऽवा॒न्तरदि॒शाभ्यः॑ ।
 अ॒वा॒न्तरदि॒शाभ्यः॑ स्वा॒हा॑ । अ॒वा॒न्तरदि॒शाभ्य॑ इत्य॒वा॒न्तर-दि॒शाभ्यः॑ ।
 स्वा॒हा॑ स॒मा॒भ्यः॑ । स॒मा॒भ्यः॑ स्वा॒हा॑ । स्वा॒हा॑ श॒रद्भ्यः॑ ।
 श॒रद्भ्यः॑ स्वा॒हा॑ । श॒रद्भ्य॑ इति श॒रत् - भ्यः॑ । स्वा॒हा॑ऽहो॒रा॒त्रेभ्यः॑ ।
 अ॒हो॒रा॒त्रेभ्यः॑ स्वा॒हा॑ । अ॒हो॒रा॒त्रेभ्य॑ इत्य॒हः - रा॒त्रेभ्यः॑ ।
 स्वा॒हा॑ऽर्ध॒मा॒सेभ्यः॑ । अ॒र्ध॒मा॒सेभ्यः॑ स्वा॒हा॑ ।
 अ॒र्ध॒मा॒सेभ्य॑ इत्य॒र्ध - मा॒सेभ्यः॑ । स्वा॒हा॑ मा॒सेभ्यः॑ ।

सप्तम काण्डे – प्रथमः प्रश्नः (TS 7.1)

मा॒से॒भ्यः॑ स्वा॒हा । स्वा॒हा ऋ॒तु॒भ्यः॑ । ऋ॒तु॒भ्यः॑ स्वा॒हा । ऋ॒तु॒भ्यः॑
इ॒त्यु॒तु – भ्यः॑ । स्वा॒हा स॒म्व॑त्सराय । स॒म्व॑त्सराय स्वा॒हा ।
स॒म्व॑त्सरायेति स॒म्व॑त्सराय । स्वा॒हा स॒र्वस्मै॑ । स॒र्वस्मै॑ स्वा॒हा ।
स्वा॒हेति॑ स्वा॒हा ॥ 44 (47/54)

(पृ॒थि॒व्यै॑ सू॒र्या॒य नक्ष॑त्रेभ्यः प्रा॒च्यै॑ स॒प्तच॑त्वारि॒ंशत्) (A15)

TS 7.1.16.1 - Kramam

अ॒ग्नये॑ स्वा॒हा । स्वा॒हा सो॒माय॑ । सो॒माय॑ स्वा॒हा । स्वा॒हा स॒वित्रे॑ ।
स॒वित्रे॑ स्वा॒हा । स्वा॒हा स॒रस्व॑त्यै । स॒रस्व॑त्यै स्वा॒हा । स्वा॒हा पू॒ष्णे ।
पू॒ष्णे स्वा॒हा । स्वा॒हा बृ॒हस्प॑तये । बृ॒हस्प॑तये स्वा॒हा । स्वा॒हाऽपाम् ।
अ॒पाम् मो॒दाय॑ । मो॒दाय॑ स्वा॒हा । स्वा॒हा वा॒यवे॑ । वा॒यवे॑ स्वा॒हा ।
स्वा॒हा मि॒त्राय॑ । मि॒त्राय॑ स्वा॒हा । स्वा॒हा व॒रुणाय॑ । व॒रुणाय॑ स्वा॒हा ।
स्वा॒हा स॒र्वस्मै॑ । स॒र्वस्मै॑ स्वा॒हा । स्वा॒हेति॑ स्वा॒हा ॥ 45 (23/23)

(अ॒ग्नये॑ स॒वित्रे॑ पू॒ष्णेऽपाम् मो॒दाय॑ वा॒यवे॑ त्रयो॒विं॑शतिः) (A16)

TS 7.1.17.1 - Kramam

पृ॒थि॒व्यै॑ स्वा॒हा । स्वा॒हाऽन्तरि॑क्षाय । अ॒न्तरि॑क्षाय स्वा॒हा । स्वा॒हा
दि॒वे । दि॒वे स्वा॒हा । स्वा॒हाऽग्नये॑ । अ॒ग्नये॑ स्वा॒हा । स्वा॒हा सो॒माय॑ ।

तैत्तिरीय संहिता क्रम पाठे (TS 7.1)

सो॒माय॑ स्वा॒हा । स्वा॒हा सू॒र्याय॑ । सू॒र्याय॑ स्वा॒हा । स्वा॒हा च॒न्द्रम॑से ।
च॒न्द्रम॑से स्वा॒हा । स्वा॒हाऽह॑ । अ॒हे स्वा॒हा । स्वा॒हा रा॒त्रियै॑ ।
रा॒त्रियै॑ स्वा॒हा । स्वा॒हर्ज॑वे । ऋ॒जवे॑ स्वा॒हा । स्वा॒हा सा॒धवे॑ ।
स्वा॒धवे॑ स्वा॒हा । स्वा॒हा सु॒क्षित्यै॑ । सु॒क्षित्यै॑ स्वा॒हा । सु॒क्षित्या॑ इति॑
सु - क्षि॒त्यै । स्वा॒हा क्षु॒धे । क्षु॒धे स्वा॒हा । स्वा॒हाऽऽशि॑ति॒म्ने ।
आ॒शि॒ति॒म्ने स्वा॒हा । स्वा॒हा रो॒गाय॑ । रो॒गाय॑ स्वा॒हा । स्वा॒हा हि॒माय॑ ।
हि॒माय॑ स्वा॒हा । स्वा॒हा शी॒ताय॑ । शी॒ताय॑ स्वा॒हा । स्वा॒हाऽऽत॑पाय॑ ।
आ॒तपा॑य स्वा॒हा । आ॒तपा॑येत्या - त॒पाय॑ । स्वा॒हाऽऽर॑ण्याय॑ ।
अ॒रण्या॑य स्वा॒हा । स्वा॒हा सु॒वर्गाय॑ । सु॒वर्गाय॑ स्वा॒हा ।
सु॒वर्गाये॑ति सु॒वः - गा॑य । स्वा॒हा लो॒काय॑ । लो॒काय॑ स्वा॒हा ।
स्वा॒हा स॒र्वस्मै॑ । स॒र्वस्मै॑ स्वा॒हा । स्वा॒हेति॑ स्वा॒हा ॥ 46 (44/47)

(पृ॒थिव्या॑ अ॒ग्नये॑ऽह॑ रा॒त्रियै॑ च॒तुश्च॑त्वारि॒ंशत्) (A17)

TS 7.1.18.1 - Kramam

भु॒वो दे॒वाना॑म् । दे॒वाना॑म् क॒र्मणा॑ । क॒र्मणा॑ऽप॒सा । अ॒पस॑र्त॒स्य ।
ऋ॒तस्य॑ प॒थ्या । प॒थ्याऽसि॑ । अ॒सि व॑सु॒भिः । व॑सु॒भिर् दे॒वेभिः॑ ।
व॑सु॒भिरि॑ति॒ वसु॑ - भिः । दे॒वेभिर् दे॒वत॑या । दे॒वत॑या गा॒यत्रे॑ण ।

गा॒य॒त्रेण॑ त्वा । त्वा॒ छ॒न्द॒सा । छ॒न्द॒सा यु॒न॒ज्मि । यु॒न॒ज्मि व॒स॒न्तेन॑ ।
व॒स॒न्तेन॑ त्वा । त्व॒र्तु॒ना ॥ ऋ॒तु॒ना ह॒विषा॑ । ह॒विषा॑ दी॒क्षया॑मि ।
दी॒क्षया॑मि रु॒द्रेभिः॑ । रु॒द्रेभिर् दे॒वेभिः॑ । दे॒वेभिर् दे॒वत॑या ।
दे॒वत॑या त्रै॒ष्टुभे॑न । त्रै॒ष्टुभे॑न त्वा । त्वा॒ छ॒न्द॒सा । छ॒न्द॒सा यु॒न॒ज्मि ।
यु॒न॒ज्मि ग्री॒ष्मेण॑ । ग्री॒ष्मेण॑ त्वा । त्व॒र्तु॒ना ॥ ऋ॒तु॒ना ह॒विषा॑ ।
ह॒विषा॑ दी॒क्षया॑मि । दी॒क्षया॑म्यादि॒त्येभिः॑ । आ॒दि॒त्यैभिर् दे॒वेभिः॑ ।
दे॒वेभिर् दे॒वत॑या । दे॒वत॑या जा॒गते॑न । जा॒गते॑न त्वा । त्वा॒ छ॒न्द॒सा ।
छ॒न्द॒सा यु॒न॒ज्मि । यु॒न॒ज्मि व॒र्षाभिः॑ । व॒र्षाभि॑स्त्वा । त्व॒र्तु॒ना ॥
ऋ॒तु॒ना ह॒विषा॑ । ह॒विषा॑ दी॒क्षया॑मि । दी॒क्षया॑मि वि॒श्वेभिः॑ । वि॒श्वेभिर्
दे॒वेभिः॑ । दे॒वेभिर् दे॒वत॑या । दे॒वत॑याऽऽनु॒ष्टुभे॑न । आ॒नु॒ष्टुभे॑न त्वा ।
आ॒नु॒ष्टुभे॑ने॒त्यानु॑ – स्तु॒भेन॑ । त्वा॒ छ॒न्द॒सा । छ॒न्द॒सा यु॒न॒ज्मि () ।

य॒न॒ज्मि श॒रदा॑ ॥ 47 (50/52)

TS 7.1.18.2 - Kramam

श॒रदा॑ त्वा । त्व॒र्तु॒ना ॥ ऋ॒तु॒ना ह॒विषा॑ । ह॒विषा॑ दी॒क्षया॑मि ।
दी॒क्षया॑म्य॒ङ्गिरो॑भिः । अ॒ङ्गिरो॑भिर् दे॒वेभिः॑ ।
अ॒ङ्गिरो॑भिरि॒त्यङ्गि॑रः-भिः । दे॒वेभिर् दे॒वत॑या । दे॒वत॑या पा॒ङ्क्ते॑न ।

पाङ्क्तेन॑ त्वा । त्वा॑ छन्द॒सा । छन्द॒सा युन॑ज्मि ।
युन॑ज्मि हे॒मन्त॑शि॒शिरा॑भ्याम् ॥ हे॒मन्त॑शि॒शिरा॑भ्याम् त्वा ।
हे॒मन्त॑शि॒शिरा॑भ्यामि॒ति हे॒मन्त॑ - शि॒शिरा॑भ्याम् । त्व॒र्तुना॑ ॥ ऋ॒तुना॑
ह॒विषा॑ ॥ ह॒विषा॑ दी॒क्षया॑मि । दी॒क्षया॑म्याहम् । अ॒हम् दी॒क्षाम् ।
दी॒क्षाम॑रुहम् । अ॒रुह॑मृ॒तस्य॑ । ऋ॒तस्य॑ प॒त्नीम् । प॒त्नीम् गाय॑त्रेण ।
गाय॑त्रेण छन्द॒सा । छन्द॒सा ब्र॑ह्मणा । ब्र॑ह्मणा च । च॒र्तम् । ऋ॒तꣳ
स॒त्ये । स॒त्येऽधाम् । अ॒थाꣳ स॒त्यम् । स॒त्यमृ॑ते । ऋ॒तेऽधाम् ।
अ॒धामि॑त्यधाम् ॥ म॒हीमु॑ । ऊ॒षु । सु सु॒त्रामा॑णम् । सु॒त्रामा॑णमिह ।
सु॒त्रामा॑णमि॒ति सु॒त्रामा॑णम् । इ॒ह धृ॑तिः । धृ॑तिः स्वाहा॑ ॥ स्वाहे॒ह ।
इ॒ह वि॑धृतिः । वि॑धृतिः स्वाहा॑ ॥ वि॑धृतिरि॒ति वि॒ - धृ॑तिः । स्वाहे॒ह ।
इ॒ह र॑न्तिः । र॑न्तिः स्वाहा॑ ॥ स्वाहे॒ह । इ॒ह र॑मतिः । र॑मतिः स्वाहा॑ ॥
स्वाहे॒ति स्वाहा॑ ॥ 48 (49/52)

(आनुष्टु॒भेन॑ त्वा॑ छन्द॒सा युन॑ज्म्ये - का॒न्न पञ्चा॑शच्च॑) (A18)

TS 7.1.19.1 - Kramam

ईङ्का॒राय॑ स्वाहा॑ ॥ ईङ्का॒राये॑तीम् - का॒राय॑ । स्वाहे॒ङ्कृ॑ताय ।
ईङ्कृ॑ताय॑ स्वाहा॑ ॥ ईङ्कृ॑ताये॑तीम् - कृ॒ताय॑ । स्वाहा॑ क्रन्द॑ते ।

सप्तम काण्डे – प्रथमः प्रश्नः (TS 7.1)

क्र॒न्दते॑ स्वा॒हा । स्वा॒हाऽव॒क्रन्द॑ते । अव॒क्रन्द॑ते स्वा॒हा । अव॒क्रन्द॑त
इ॒त्यव॑ – क्र॒न्दते॑ । स्वा॒हा प्रो॒थते॑ । प्रो॒थते॑ स्वा॒हा । स्वा॒हा प्र॒प्रोथ॑ते ।
प्र॒प्रोथ॑ते स्वा॒हा । प्र॒प्रोथ॑त इति॑ प्र – प्रो॒थते॑ । स्वा॒हा ग॒न्धाय॑ ।
ग॒न्धाय॑ स्वा॒हा । स्वा॒हा घ्रा॒ताय॑ । घ्रा॒ताय॑ स्वा॒हा । स्वा॒हा प्रा॒णाय॑ ।
प्रा॒णाय॑ स्वा॒हा । प्रा॒णाय॑ेति॑ प्र – अ॒नाय॑ । स्वा॒हा व्या॒नाय॑ । व्या॒नाय॑
स्वा॒हा । व्या॒नाय॑ेति॑ वि-अ॒नाय॑ । स्वा॒हाऽपा॒नाय॑ । अ॒पा॒नाय॑ स्वा॒हा ।
अ॒पा॒नाय॑ेत्य॒प – अ॒नाय॑ । स्वा॒हा स॒न्दीय॑मा॒नाय॑ । स॒न्दीय॑मा॒नाय॑
स्वा॒हा । स॒न्दीय॑मा॒नाय॑ेति॑ सम् – दी॒यमा॒नाय॑ । स्वा॒हा स॒न्दि॒ताय॑ ।
स॒न्दि॒ताय॑ स्वा॒हा । स॒न्दि॒ताय॑ेति॑ सम् – दि॒ताय॑ ।
स्वा॒हा वि॒चृ॒त्यमा॒नाय॑ । वि॒चृ॒त्यमा॒नाय॑ स्वा॒हा ।
वि॒चृ॒त्यमा॒नाय॑ेति॑ वि – चृ॒त्यमा॒नाय॑ । स्वा॒हा वि॒चृ॒त्ताय॑ ।
वि॒चृ॒त्ताय॑ स्वा॒हा । वि॒चृ॒त्ताय॑ेति॑ वि – चृ॒त्ताय॑ । स्वा॒हा
प॒लायि॑ष्यमा॒णाय॑ । प॒लायि॑ष्यमा॒णाय॑ स्वा॒हा । स्वा॒हा प॒लायि॑ताय॑ ।
प॒लायि॑ताय॑ स्वा॒हा । स्वा॒होप॒र॒स्य॑ते । उप॒र॒स्य॑ते स्वा॒हा ।
उप॒र॒स्य॑त इ॒त्युप॑ – र॒स्य॑ते । स्वा॒होप॒र॒ताय॑ । उप॒र॒ताय॑ स्वा॒हा ।

तैत्तिरीय संहिता क्रम पाठे (TS 7.1)

उ॒पर॒ताये॒त्युप॑ – र॒ताय॑ । स्वा॒हा नि॒वेक्ष्य॑ते । नि॒वेक्ष्य॑ते स्वा॒हा ।
नि॒वेक्ष्य॑त इति॑ नि – वे॒क्ष्यते॑ । स्वा॒हा नि॒विश॑मानाय । नि॒विश॑मानाय
स्वा॒हा । नि॒विश॑मानायेति॑ नि – वि॒शमा॑नाय । स्वा॒हा नि॒विष्टाय॑ ।
नि॒विष्टाय॑ स्वा॒हा । नि॒विष्टा॑येति॑ नि – वि॒ष्टाय॑ । स्वा॒हा नि॒षथ्स्य॑ते ।
नि॒षथ्स्य॑ते स्वा॒हा । नि॒षथ्स्य॑त इति॑ नि – स॒थ्स्य॑ते ।
स्वा॒हा नि॒षीद॑ते । नि॒षीद॑ते स्वा॒हा । नि॒षीद॑त इति॑ नि – सी॒दते॑ ।
स्वा॒हा नि॒षण्णाय॑ । नि॒षण्णाय॑ स्वा॒हा । नि॒षण्णा॑येति॑ नि – स॒न्नाय॑ ।
स्वा॒हाऽऽसि॑ष्यते । 49 (50/69)

TS 7.1.19.2 - Kramam

आ॒सि॒ष्यते॑ स्वा॒हा । स्वा॒हाऽऽसी॑नाय । आ॒सीनाय॑ स्वा॒हा ।
स्वा॒हाऽऽसि॑ताय । आ॒सिताय॑ स्वा॒हा । स्वा॒हा नि॒पथ्स्य॑ते ।
नि॒पथ्स्य॑ते स्वा॒हा । नि॒पथ्स्य॑त इति॑ नि – प॒थ्स्य॑ते ।
स्वा॒हा नि॒पद्य॑मानाय । नि॒पद्य॑मानाय स्वा॒हा । नि॒पद्य॑मानायेति॑
नि – प॒द्यमा॑नाय । स्वा॒हा नि॒पन्नाय॑ । नि॒पन्नाय॑ स्वा॒हा । नि॒पन्ना॑येति॑
नि–प॒न्नाय॑ । स्वा॒हा श॒यिष्य॑ते । श॒यिष्य॑ते स्वा॒हा । स्वा॒हा श॒यानाय॑ ।
श॒यानाय॑ स्वा॒हा । स्वा॒हा श॒यिताय॑ । श॒यिताय॑ स्वा॒हा ।

सप्तम काण्डे – प्रथमः प्रश्नः (TS 7.1)

स्वाहा॑ सम्मी॒लिष्य॑ते । सम्मी॒लिष्य॑ते स्वाहा॑ । सम्मी॒लिष्य॑त इति॑
सम् – मी॒लिष्य॑ते । स्वाहा॑ सम्मी॒लते॑ । सम्मी॒लते॑ स्वाहा॑ ।
सम्मी॒लत॑ इति॑ सम् – मी॒लते॑ । स्वाहा॑ सम्मी॒लिताय॑ । सम्मी॒लिताय॑
स्वाहा॑ । सम्मी॒लतायेति॑ सम् – मी॒लिताय॑ । स्वाहा॑ स्वप्स्य॑ते ।
स्वप्स्य॑ते स्वाहा॑ । स्वाहा॑ स्वप॑ते । स्वप॑ते स्वाहा॑ । स्वाहा॑ सुप्ताय॑ ।
सुप्ताय॑ स्वाहा॑ । स्वाहा॑ प्रभो॑त्स्यते । प्रभो॑त्स्यते स्वाहा॑ ।
प्रभो॑त्स्यत इति॑ प्र – भो॑त्स्यते । स्वाहा॑ प्रबु॑द्ध्यमानाय॑ ।
प्रबु॑द्ध्यमानाय॑ स्वाहा॑ । प्रबु॑द्ध्यमानायेति॑ प्र – बु॑द्ध्यमानाय॑ ।
स्वाहा॑ प्रबु॑द्धाय॑ । प्रबु॑द्धाय॑ स्वाहा॑ । प्रबु॑द्धायेति॑ प्र – बु॑द्धाय॑ ।
स्वाहा॑ जाग॑रिष्यते । जाग॑रिष्यते स्वाहा॑ । स्वाहा॑ जाग्र॑ते ।
जाग्र॑ते स्वाहा॑ । स्वाहा॑ जाग॑रिताय॑ । जाग॑रिताय॑ स्वाहा॑ ।
स्वाहा॑ शु॒श्रूष॑माणा॒य । शु॒श्रूष॑माणा॒य स्वाहा॑ । स्वाहा॑ शृ॒ण्वते॑ ।
शृ॒ण्वते॑ स्वाहा॑ । स्वाहा॑ श्रु॒ताय॑ । श्रु॒ताय॑ स्वाहा॑ । स्वाहा॑ वी॒क्षिष्य॑ते ।
वी॒क्षिष्य॑ते स्वाहा॑ । वी॒क्षिष्य॑त इति॑ वि – ई॒क्षिष्य॑ते ।
स्वाहा॑ वी॒क्षमा॑णाय॑ । 50 (50/60)

TS 7.1.19.3 - Kramam

वी॒क्ष॒मा॒णाय॑ स्वा॒हा । वी॒क्ष॒मा॒णाये॑ति वि - ई॒क्ष॒मा॒णाय॑ ।
 स्वा॒हा वी॒क्षि॑ताय । वी॒क्षि॑ताय स्वा॒हा । वी॒क्षि॑ताये॒ति वि - ई॒क्षि॑ताय ।
 स्वा॒हा स॒ञ्हा॒स्य॒ते । स॒ञ्हा॒स्य॒ते स्वा॒हा । स॒ञ्हा॒स्य॒त इति॑
 सम् - हा॒स्य॒ते । स्वा॒हा स॒ज्जि॑हानाय । स॒ज्जि॑हानाय स्वा॒हा ।
 स॒ज्जि॑हानाये॒ति सम् - जि॑हानाय । स्वा॒हो॒ज्जि॑हानाय । उ॒ज्जि॑हानाय
 स्वा॒हा । उ॒ज्जि॑हानायेत्युत् - जि॑हानाय । स्वा॒हा वि॒व॒थ्स्य॑ते ।
 वि॒व॒थ्स्य॑ते स्वा॒हा । वि॒व॒थ्स्य॑त इति॑ वि - व॒थ्स्य॑ते । स्वा॒हा
 वि॒व॒र्त॑मानाय । वि॒व॒र्त॑मानाय स्वा॒हा । वि॒व॒र्त॑मानाये॒ति वि-व॑र्तमानाय ।
 स्वा॒हा वि॒वृ॑त्ताय । वि॒वृ॑त्ताय स्वा॒हा । वि॒वृ॑त्ताये॒ति वि - वृ॑त्ताय ।
 स्वा॒हो॒त्था॒स्य॒ते । उ॒त्था॒स्य॒ते स्वा॒हा । उ॒त्था॒स्य॒त इत्युत् - स्था॒स्य॒ते ।
 स्वा॒हो॒त्ति॑ष्ठते । उ॒त्ति॑ष्ठते स्वा॒हा । उ॒त्ति॑ष्ठत इत्युत् - ति॑ष्ठते ।
 स्वा॒हो॒त्थि॑ताय । उ॒त्थि॑ताय स्वा॒हा । उ॒त्थि॑तायेत्युत् - स्ति॑ताय ।
 स्वा॒हा वि॒ध॒वि॒ष्य॑ते । वि॒ध॒वि॒ष्य॑ते स्वा॒हा । वि॒ध॒वि॒ष्य॑त इति॑
 वि - ध॒वि॒ष्य॑ते । स्वा॒हा वि॒धू॒न्वा॒नाय॑ । वि॒धू॒न्वा॒नाय॑ स्वा॒हा ।
 वि॒धू॒न्वा॒नाये॒ति वि-धू॑न्वा॒नाय॑ । स्वा॒हा वि॒धू॒ताय॑ । वि॒धू॒ताय॑ स्वा॒हा ।

सप्तम काण्डे – प्रथमः प्रश्नः (TS 7.1)

वि॒धू॒ता॒येति॑ वि – धू॒ताय॑ । स्वा॒हो॒त्क्र॑स्यते । उत्क्र॑स्यते स्वा॒हा ॥
उत्क्र॑स्यत इत्युत् – क्र॑स्यते । स्वा॒हो॒त्क्राम॑ते । उत्क्राम॑ते स्वा॒हा ॥
उत्क्राम॑त इत्युत् – क्राम॑ते । स्वा॒हो॒त्क्रान्ता॑य । उत्क्रान्ता॑य स्वा॒हा ॥
उत्क्रान्ता॑येत्युत् – क्रान्ता॑य । स्वा॒हा च॑ङ्क्रमिष्यते । च॑ङ्क्रमिष्यते
स्वा॒हा । स्वा॒हा च॑ङ्क्रम्यमा॒णाय॑ । च॑ङ्क्रम्यमा॒णाय॑ स्वा॒हा ।
स्वा॒हा च॑ङ्क्रमिता॒य । च॑ङ्क्रमिता॒य स्वा॒हा । स्वा॒हा क॑ण्डूयिष्यते ।
क॑ण्डूयिष्यते स्वा॒हा । स्वा॒हा क॑ण्डूयमा॒णाय॑ । क॑ण्डूयमा॒णाय॑ स्वा॒हा ॥
स्वा॒हा क॑ण्डूयिता॒य । क॑ण्डूयिता॒य स्वा॒हा । स्वा॒हा नि॑कषिष्यते ।
नि॑कषिष्यते स्वा॒हा । नि॑कषिष्यत इति॑ नि – क॑षिष्यते ।
स्वा॒हा नि॑कषमा॒णाय॑ । नि॑कषमा॒णाय॑ स्वा॒हा () ।
नि॑कषमा॒णायेति॑ नि – क॑षमा॒णाय॑ । स्वा॒हा नि॑कषिता॒य ।
नि॑कषिता॒य स्वा॒हा । नि॑कषिता॒येति॑ नि – क॑षिता॒य । स्वा॒हा यत् ।
यद॑त्ति । अ॒त्ति तस्मै॑ । तस्मै॑ स्वा॒हा । स्वा॒हा यत् । यत् पि॑बति ।
पि॑बति तस्मै॑ । तस्मै॑ स्वा॒हा । स्वा॒हा यत् । यन् मे॑हति । मे॑हति
तस्मै॑ । तस्मै॑ स्वा॒हा । स्वा॒हा यत् । यच्छ॑कृत् । श॑कृत् करो॒ति ।

करोति॑ तस्मै॑ । तस्मै॑ स्वाहा॑ । स्वाहा॑ रेत॑से । रेत॑से स्वाहा॑ ।
 स्वाहा॑ प्रजा॑भ्यः । प्रजा॑भ्यः स्वाहा॑ । प्रजा॑भ्य इति॑ प्र – जा॑भ्यः ।
 स्वाहा॑ प्रजन॑नाय । प्रजन॑नाय स्वाहा॑ । प्रजन॑नायेति॑ प्र – जन॑नाय ।
 स्वाहा॑ सर्व॑स्मै । सर्व॑स्मै स्वाहा॑ । स्वाहेति॑ स्वाहा॑ ॥ 51 (77/99)

(निष॑ण्णाय॑ स्वाहा॑ – वीक्षि॑ष्यते स्वाहा॑ – नि॒कष॑माणाय॑ स्वाहा॑ –

सप्त॑विंशतिश्च) (A19)

TS 7.1.20.1 - Kramam

अ॒ग्नये॑ स्वाहा॑ । स्वाहा॑ वा॒यवे॑ । वा॒यवे॑ स्वाहा॑ । स्वाहा॑ सू॒र्याय॑ ।
 सू॒र्याय॑ स्वाहा॑ । स्वाह॑र्तम् । ऋ॒तम॑सि । अ॒स्यृ॒तस्य॑ । ऋ॒तस्य॑र्तम् ।
 ऋ॒तम॑सि । अ॒सि स॒त्यम् । स॒त्यम॑सि । अ॒सि स॒त्यस्य॑ । स॒त्यस्य॑
 स॒त्यम् । स॒त्यम॑सि । अ॒स्यृ॒तस्य॑ । ऋ॒तस्य॑ प॒न्थाः । प॒न्था अ॑सि ।
 अ॒सि दे॒वानाम् । दे॒वानाम् छा॒या । छा॒याऽमृ॑तस्य । अ॒मृ॒तस्य॑ ना॒म ।
 ना॒म तत् । तथ् स॒त्यम् । स॒त्यम् य॑त् । यत् त्वम् । त्वम् प्र॒जाप॑तिः ।
 प्र॒जाप॑तिर॒सि । प्र॒जाप॑तिरिति॑ प्रजा – पतिः । अ॒स्यधि॑ । अधि॑ यत् ।
 यद॑स्मिन् । अ॒स्मिन् वा॒जिनि॑ । वा॒जिनी॑व । इ॒व शु॒भः ।
 शु॒भः स्प॑र्द्धन्ते । स्प॑र्द्धन्ते दि॒वः । दि॒वः सू॒र्येण॑ । सू॒र्येण॑ वि॒शः ।

सप्तम काण्डे – प्रथमः प्रश्नः (TS 7.1)

वि॒शो॒ऽपः । अ॒पो वृ॒णानः॑ । वृ॒णानः॑ प॒वते॑ । प॒वते॑ क॒व्यन् । क॒व्यन्
प॒शुम् । प॒शुम् न । न गो॒पाः । गो॒पा इ॒र्यः॑ । गो॒पा इति॑ गो – पाः ।
इ॒र्यः॑ परि॒ज्मा । परि॒ज्मेति॑ परि – ज्मा ॥ 52 (48/50)

(अ॒ग्नये॑ वा॒यवे॑ सू॒र्याया॑ – ष॒चत्वा॑रि॒ञ्शत्) (A20)

Prasna Korvai with starting Padams of 1 to 20 Anuvaakams :-

(प्र॒जन॑नं – प्रा॒तस्स॒वने॑ वै – ब्र॒ह्मवा॑दि॒नः स॒ त्वा – अ॒ङ्गिर॑स –
आ॒पो वै – सो॒मो वै – स॒हस्र॑त॒म्या – त्रि – र्ज॑म॒दग्निः॑ –
सँव॑त्स॒रो – दे॒वस्य॑ – वि॒भू – रा॒यना॑या – ऽग्नये॑ – पृ॒थि॒व्या –
अ॒ग्नये॑ – पृ॒थि॒व्यै – भुव॑ – ई॒कां॒राया॑ – ग्नये॑ वा॒यवे॑ सू॒र्याया॑ –
वि॒ञ्श॑तिः)

Korvai with starting Padams of 1, 11, 21 Series of Panchaatis :-

(प्र॒जन॑न – म॒ङ्गिर॑सः – सो॒मो वै – प्र॒तिगृ॑ह्णाति – वि॒भू –
वी॒क्ष॑मा॒णाय॑ – द्वि॒पञ्चा॑शत्)

तैत्तिरीय संहिता क्रम पाठे (TS 7.1)

First and Last Padam of First Prasnam of 7th Kanda

(प्र॒जन॑नं – परि॒ज्मा)

॥ हरिः ओं ॥

॥ इति सप्तमकाण्डे प्रथमः प्रश्नः क्रम पाठः समाप्तः ॥

=====

Details of Panchati, Padam and Krama Vaakyam for Kanda 7,Prasanam 1 – (TS 7.1)

	Panchati	Padams	Krama Vaakyam
Anuvakam 1	6	309	363
Anuvakam 2	1	63	75
Anuvakam 3	3	144	169
Anuvakam 4	3	171	205
Anuvakam 5	7	347	405
Anuvakam 6	8	389	451
Anuvakam 7	4	212	246
Anuvakam 8	2	118	145
Anuvakam 9	1	48	56
Anuvakam 10	4	200	245
Anuvakam 11	1	75	82

सप्तम काण्डे – प्रथमः प्रश्नः (TS 7.1)

Anuvakam 12	1	72	80
Anuvakam 13	1	26	37
Anuvakam 14	1	23	23
Anuvakam 15	1	47	54
Anuvakam 16	1	23	23
Anuvakam 17	1	44	47
Anuvakam 18	2	99	104
Anuvakam 19	3	177	228
Anuvakam 20	1	48	50
Total →	52	2635	3088